

燕

對

樓

詩

選

丑

七

五

古

古

燕

世對樓詩選目錄卷第四

五言古詩

夏夜

醉中自述

聞仲連過高霞館

送君房箕仲長孺兼寄肩吾

懲忿詩

贈山人

送張貢士孺穀

送張任子孺覺卒業南雍

理髮

披雲閣對雨

月榭小集

贈幽人

夕發

積陰

樂志詩

作全

蜡日後集司馬公園分入字

與高李二生晚步芙蓉江上

已亥十月十日舉孫牛郎志喜

題文太史松石圖楮本

有序

遲葉鄭朗高子高不至

荅坤公月夜見懷作

嗟嗟

荅杜蒼舒見寄

同汪仲淹方翁恬汪象先柴仲初聞仲連葉鄭

朗朗集楊伯翼滄洲草堂分落字

六傷詩

傷大司馬張公時徹

傷太僕卿沈公愷

傷馮山人子喬遷

傷徐方伯子與中行

傷朱太學邦憲察鄉

傷沈太史君典懋學

山中入

寶陽篇

題画册

題枯木竹石圖

壽王長公元美司寇

奉和葉茂長王太古留別贈言

哭吊呂太興心文 紀異寄五少宰

西川胡君出粟賑饑郡縣旌義方生乞詩賦贈

病述一 病言二首

二之日掃舍 晚登厲山作

錢子南孝廉招遊秀野園紀勝

五柳軒 茅棟漏徒牀不能定

竹林二首 樵歌

長林石几亭 寒芳亭

松月臺 有待軒

薔薇曲 經頂山

秦娥碣 不見

大樹陰 禦兒涇

斜林笛 淨妙鐘

入江浦縣東城外陳氏竹園

黃崖嶺 黃雪幕

梅花國 奧如室

淡妝工自理

豐對樓詩選卷第四

甬句東沈明臣嘉則父著  
從子沈九疇箕仲氏選

五言古詩

夏夜

夏夜衆苦短不寐嫌獨長攬衣起中夜明月低西方  
虛庭衆星朗漸覺迴風涼起傍嘉樹林泚泚聲在桑  
迴步虛庭中仰見銀河橫叶銀河隔牛女只尺徒相  
望誰能化雙翼飛作青天梁青天不可度涕泗沾衣

裳

一理髮

理髮東軒下朝暎明素壁滿梳墮青絲間有一二白  
 大化無停機烏兔旋相織人生宇宙間豈能皆滿百  
 我生四十年百歲半已迫白髮固所宜何勞重嘆息  
 歎息復歎息中歲不聞道恐負架上書沒或同蔓草  
 開門對青山坐見庭柯老

醉中自述

余生乃孱弱性姿復寡昧讀書空山中時明拙無位  
 貧多湖海交老乏兒女輩落魄曾不憂踈狂笑難慧  
 逢人不善藏聞花輒思對五十餘七年皮骨頗憔悴  
 所秉微尚操屹屹不敢墜五日一洗沐十日一大醉  
 游戲污瀆中俯仰乾坤內何以答君親不負名教罪  
 裸葬學王孫逍遙亦何謂

披雲閣對雨

海雨到空山江雲住飛閣冥冥千樹寒蕭蕭四簷落  
 初鳴乍微細忽霽更寥廓所以達士觀臨風一為喙  
 聞仲連過高霞館

燦燦池上花苑苑城南柳嚶嚶春鳥鳴矯矯青雲友  
 杲杲丹霞樓湛湛綠罇酒相逢聊盡驩毋令皓吾首

一月榭小集

素雪積陰殿晴雲蕩遙天衆山錯金碧天地相澄鮮  
瑤宮集賓從何異蓬壺仙對酒不盡醉颯颯空華顛  
且訝君不見古墓犁為田俯瞰碧海色清淺誰為填  
送君房箕仲長孺兼寄肩吾  
同心今夜別相見何年月舉酒向君前欲言氣復結  
氣結不可道愁心劇春草行行萬里途塵霜幾昏曉  
努力事名勲貞心吾自保山中饒藥物無庸念枯槁  
寄語舊所惟明德以為寶

懲忿詩

天地本高厚人情有恩仇胡為薄夫見錙銖等山丘  
睚眦報乃已豈是寬身謀孔子憲昭訓厚德酬恩私  
丈夫懷小忿何用叱咤為陳餘有微過耳受里吏笞  
里吏不足死耳也桑間警王孫辱胯下貴來反謝之  
魯連萬夫長子房百世師國耻愧不雪世紛當解觴  
小白讐九世無乃非王師忿詈不及我閉閣當自思

贈幽人

幽人履貞素結屋中條山雲霞日攬結流泉俯潺湲  
灌木潤蒼靄春風吹草菅嚶嚶衆鳥語滿耳絃歌間  
望見東海月遙遙照玄關良宵理絲竹心神曠而閒  
天地亦土苴悲歡自循環人生且快意何必凋朱顏

山中酒家近來往不復艱願息風塵駕與子相盤桓

贈山人

雲卧三十年今始入城郭綠眉飄紫髯猶疑洒風壑  
身著芙蓉裳爛然奪人目如坐煙嵐中滋滋浸春木  
一見令人嗟再覩令人愕惘然朱塵中飛花任飄泊  
安得與同游翱翔在寥廓

夕發

向夕發江舸坐聽水聲滑風高海日昏地凍野草殺  
瞑投漁家飯夜理故人札搔首寒燈下孤劍聊自拔

送張貢士孺毅

衆口鑠黃金積毀銷白骨黃河有清時渭水有時涵  
市虎成三人投杼豈倉卒回生同拾煤竊斧疑當闕  
君今四海交勿易成吳越吳越弟兄親按劍投明月  
是以管鮑心相照空毛髮願子崇明德懇結王生襪  
去去萬里途執鞭遲明發

送張任子孺覺卒業南雍

條風灑膏雨春風濕波濤青陽動林末崇蘭被東臯  
曜靈澹煙景綠水驕晴膏美人遊上國川陸鳴軻軻  
願言雙解佩贈子以遊遨雙珮光陸離固比君子操  
上國故帝京觀閣何若堯群雄集槐市濟濟咸俊髦



前脩有遺矩慎勿相乖撓刷翮埃脩景排空恣翔翽  
况子世胄質麟角森鳳毛譬登千仞岡順風彈雲璈  
願保金玉軀明德躋崇高

積陰

積陰灑零雨空城杳行跡鬻市絕薪藁山厨斷炊色  
饑來唯枕肱寘搜疲典籍慚非仲尼徒亦負陳蔡阨  
裹飯憐子桑黔婁棄嗟食賴有絃歌聲猶然出金石

樂志詩

振袂挈煙霞舒嘯登丘隴逍遙顧碎疆清曠仲長統  
束締青山緣能專白雲寵不知萬乘尊那憐九鼎重

作空

揭釜事長途空囊怯薪桂搏土作行厨携將負奴背  
乞火向隣僧荒煙積寒翠燒與紅葉宜靜許青山對  
客子常畏人飽飯閉門睡過逢倘吾徒炊黍堪一醉

蜡日後集司馬公園分入字

蜡日去未遙春光水先入綠波蕩遠空晴漪媚寒日  
梅色嬌向人柳條青欲濕美人具旨酒朋儕偶紛集  
取醉適所惟任情宜坐立日夕未云疲登臨緩相及

與高李二生晚步芙蓉江上

勝侶多曠懷江臯躡斜照波平風力微重山薄層耀

翠淡青黛濃雲霞綵相冒嶠疊秋靄分峰攢晚容峭  
 帆去白已遐復近浦縈抱掩映眺難窮迴復景殊妙  
 淑曲龍九紆巒明水千瀑長謠歸路遲煙蒼野生燒  
 何以寫清歡持醪遠相勞醉昵笑吞花驕成美人笑

已亥十月十日舉孫牛郎志喜

汝翁既已衰汝父亦已壯舉孫當其時惟喜亮非誑  
 我父見背時未之識孫行幸乃見曾孫拜禰肅言狀  
 三日湯餅設桑弧桂闕上願汝志四方衰宗竢能亢  
 庶得委琴書富貴烏所望會令崇道術永言式昭曠

題文太史松石圖楮本 有序

此松石圖乃文太史筆絹素已為禡去而筆  
 力深入故精神墨氣獨留楮上也譬之粉本  
 然草草不經意處自有神妙者存大都古人  
 名賢所画墨色俱入絹縷精神迥出尋常使  
 它人為之粉墨俱浮惡得有此此為玉山程  
 孟孺所得索余題因系以詩

昨夜置牀頭颭颭風雨響朝來起披拂聲在越楮上  
 何物有此靈神竒豁心賞怪石踞老松蒼龍怒頭掌  
 諦視不敢言青天濺飛爽筆勢欲挐風墨痕似流蕩  
 手出太史文目力疲想像細素染何深縑禡此其倣

唐詩補遺 卷四 六  
膚去裏猶全令人泚盈顙山水不能移日月不可長  
對此肌膚清空堂恣攀仰

遲葉鄭朗高子高不至

幽齋汎朝塵崇館紛書藹涼葉清已微踈花落還在  
美人來不來搔首空相待耿耿望河干青山在雲外  
荅坤公月夜見懷之作

憶昨蕭寺遊此夕竟何夕月白空山涼深松翠猶滴  
塔影挂當庭鍾聲度虛壁論詩復論禪手撫生公石  
竭來思再往阻道不可得十日雨不收長河渺天隔  
一接道林詩快讀秋濤激出門致寄將瀰天濕雲黑

嗟嗟

嗟嗟東門吳其言乃至悲深情不可寫反為達者詞  
鼓盆訶故妻三匝號殤兒何物無情甚兀然若枯枝

荅杜蒼舒見寄

西方有美人獨立世無偶仙姿燦天葩璠璣耀前後  
耳着雙明璫盃葉翠盈首玕珠雜木難佩服瓊與玖  
十三學組繡十四解歌舞十五彈箜篌十六精樂府  
幽貞未嫁人擇對良獨苦鳳皇為蹇脩鴝鳥讒復阻  
高樓終日居冰心向誰語南山有高士乃是牧犢子  
欲娶無良媒傷心對流水忽當雉雉時相思劇春

豐華詩選 卷四  
兩一朝飛鳥音遺來白雲裏長聽此音冷然金玉  
只故知均天奏不入聾者耳我欲宣此曲空江月如  
駛

同汪仲淹方翁恬汪象先柴仲初聞仲連葉鄭  
朗集楊伯翼滄洲草堂分落字

遠客自天都尋仙到三霍海色濺春袍潮痕清芒屨  
昨過官奴城坐卧湖上閣雨氣寒未踈言尋故人酌  
善病輟深卮醒然理諧謔笑指暮霞高坐見庭花落  
客辭酬獻頻主謝尊疊薄何以娛廣筵清謳佐杯杓  
丙夜未云已歸來罷宵柝

六傷詩

傷大司馬張公時徹

司馬真偉人徒步起東海敷歷三十年風聲溢所在  
鬢髮已懸車騷壇建旂彩龍門迥寥廓下士藉搜採  
素車哭夜臺鴻名待天改

傷太僕卿沈公愷

問卿事樵釣聲華震南國清操晚益堅雄文遠彌服  
正笏參大藩急流退長谷峰泖增秀采儒林寶龜玉  
生被三錫榮循墻畏優渥

傷馮山人子喬遷

漢代馮野王苗裔子喬氏博洽繼高風詩文亦宏肆  
春園載酒過門人問竒字酒德劉伯倫五斗與妻誓  
解醒復鯨吞千鬣戟而刺一死家遂零寒茅掩江滢

傷徐方伯子與中行

吳興嘉山水天目兼具區偉長生其中至寶珍璫與  
建安七子輩力戰相馳驅鴻名流大海純德無瑕瑜  
一官久牢落方岳登晚途豐城收劍氣斯人與之俱  
寂寞千載後吾道夫何如

傷朱太學邦憲察卿

朱生魯朱家任俠蓋濁世雄文祖班馬真賞呼雌霓  
交遊傾海宇行輩遵信義飲德稱酒民名父號循吏  
一朝赴冥府典詞命上帝苦遜推友生謂予乃其庶  
君乎帝不舍予也天所棄白髮空茸茸後死過十禩  
念君無已時青天迸雙淚

傷沈太史君典懋學

玄暉守宣城流風被千載莪莪敬亭山古黛青不改  
宛溪流獨長千里始到海沈生山水秀鐘靈乃其殆  
天人仲舒策一第詎云大屹立鴛鴦班危論慄鼎鼐  
涌流一楫退高翔千仞綵柰何不慙遺薤露詞空味

山中人

我愛山中人老不識城府日飽青精飯醉劈紫麟脯  
名山尋洞壑好水憇州許為漁不垂竿為樵不腰斧  
日月跳兩丸乾坤一今古春但采松花釀酒不用酤  
秋唯殮菊英餌藥不用譜何必羨桃源太樸不椎魯  
何必慕松喬恬澹無辛苦自然盡天年十百千萬數  
我生恨隔壤未得親老圃題詩寄披誦聊充鼓吹部

寶陽篇

金丹不可煉煉之唯一元葆精閉重扉毋使陽獨翻  
明珠永不餒丹玉常居尊養此不壞寶一一內境存  
玄之又玄者夫乃衆妙門空山弄瓦客中天坐崑崙  
至寶豈外索請自丹田論

題画册

勝國雲林生曠達天下士筆勢無古人逍遙絕塵滓  
畧約寫山水老樹空亭子殘山青欲無片石寒且止  
意遠趣莫窮令人喜無已俗調何可諧常從白雲逝

題枯木竹石圖

瘦石如古鐵老竹生寒香相依又牙樹不知歲月長  
柰何白足僧筆底拈風霜對月一吟弄洗得塵心涼  
壽王長公元美司寇

大吳王司寇蚤挂神武冠三詔召不起高卧東山堅

閉關煉金骨萬事俱漠然口誦妙法經手註五千言  
文章絢宇宙碧海翻紫瀾升天固自易為佛良不難  
娑婆琉璃地香風溢幢幡惟喜無量壽天花曼旃檀  
無上菩提心無量劫中者仙人供新果尔獻七珍盤  
龍宮自涌出共詣靈鷲山

奉和葉茂長王太古留別贈言

秋風厲高翻歷歷摩穹蒼閔河漸蕭瑟百卉淒寒霜  
豈不念吳會湖海儲靈祥哲侯秉遠尚詞客趨四方  
常帶抗纓冕高議翔巖廊葉舒梁溪彦王野鄆郡良  
削牘鳴雅道矢口呈琳琅兩生各奮筆獎我瑤華章  
鏗鏘奏金石綢繆音何長言念各分手日夕還故鄉  
故鄉東西隔涕泗空沾裳所要在忠信皓首當勿忘  
哭吊呂泰輿志文

與君平生交友道頗不平君已赴黃泉經歲始一哭  
埃塵漫薰憐蛛絲罥華屋心傷山陽笛酸鼻蒿里曲  
嗣子三尺孤遺經稍能讀庶幾有遠志門戶得以續  
拭我盈眶淚轉嘆以相勗

紀異寄五少宰

丁亥秋七月颶風倏兩作抵隔旬日餘何以勝此惡  
不獨風太顛兼之雨如瀑坤軸齧背歎天河水維薄

力能沸四海勢欲摧五嶽高樹崩危湍平陸沉巨壑  
飄尾落輕花類垣隕殘籜長平坑已深昆陽戰如昨  
山林木拔盡原隰花零落萬有無毫存百穀鮮一獲  
魚鱉遍溪山波濤卷城郭莫云儲稻梁誰能飽藜藿  
常深漆室膠難解杞人縛題詩寄少宰廟畧當展拓  
毋令聖人憂東顧宜有托

西川胡君出粟賑饑郡縣旌義方生乞詩賦贈  
漢家惟卜式高誼薄雲天武帝憂天下分家半助邊  
寂寥千載後誰復似其賢萬曆天王聖堯湯水旱年  
生民多餓殍海宇半顛連濟衆天恩溥田租幸免蠲

時惟光祿某二萬喜輕捐先此穆負外曾輸白鏹千  
義聲喧宇內天子為乾乾我甬胡居士聞風竊慕焉  
有司勤勸借應命即周旋平糶周閭里捐貲具粥饘  
醫藥無病瘠枯槁藉生全白骨辭螻蟻渠啣免啄鳶  
仁人為郡縣厲俗擅機權勸一真懲百風聲足播宣  
因之章物采華扁照棖椽視彼高封廬區區但守錢  
曾無汗顏者於此辨媼妍不肖賢相去天淵詎不然

病述一

七十老亞父憤懣疽發背道至彭城死千載足涕淚  
吾生憤懣深無從洩其穢俄丁戊子年豈是龍蛇歲



一疽發左肩右復與之對遽條而戚施痛絕不可治  
蚊氓山負背螳螂轍當臂瘍師五六人治法頗狼狽  
幸得劉與汪兩人功不細采藥深山中劉喬有開濟  
靈草攻破毒膿血注盈器如此十日餘右者復鼓鑄  
喬亦莫措手汪生乃施伎下泉使上涌亦復向東注  
初亦試剗剗皮厚力不利日夕坐針氈卧起幾昏謎  
淋漓膿血腥量以斗升計官刑五毒慘地獄剗燒具  
天怒劇奔騰一時不肯霽一月餘十朝思之反長涕  
不任湯藥資日勤醫師費囊空淨如洗貧乏誰與議  
參芪等黃金糜肉埒珠貝窮搜及簪珥妻妾髻如禿

琴書幸無恙狼籍几案潤塵土厚風不掃隙深月可掇  
吳天龜國長越地龍海絕雲容浩無津煙濤杳難截  
秦花沉仙源漢樹浮帝闕重披舊河山再覩新日月  
儒術本踈陋曝日被短褐背暄有遐思歆薦九重熱  
自咲迂復迂不若安蹇劣窮簷化日短憂心復啜啜

病言三首

鼎鼎百年內歡樂能幾朝情悰苦不任人事阻多撓  
冥心付造化生死皆逍遙  
死為南面王莊語固云達曠哉有至理一息萬務歇  
恬哉養吾神漠漠熙然悅

病死以藥救藥對病可活神哉醫王力似與天命奪  
嗟嗟脩短間神人詎能脫

二之日掃舍

病夫久卧蓐頗嫌筋力謝起坐復起行忻書不忻夜  
何以佐老驩新歲聊掃舍壁塵如挂珠窓網密布罅  
拂去稍清淨焚香理書架病骨恣逍遙似囚逢帝赦

晚登厲山作

落日登崇丘黯黯赴暝色蒼茫故人遠倏忽幽明隔  
萬務不可知陰陽自推移達人炳明照義命安所疑  
涼風吹素髮杖屨吾隨之

錢子南孝廉招遊秀野園紀勝

錢郎列已久尊壘旁遠携雙槩赴滄洲楊柳沿舊溪  
佳園信窈窕白日令人迷桂樹靄深翠柏廊慢青綈  
虛窓漾天影春波卧鳧鷖四座蔭喬木高簷挂虹霓  
踈雨點客袂涼風吹大隄夷猶足燕賞沉吟故時題  
所適良已快不知冥色低

五柳軒

陶公既已遠誰復種五柳有此五柳軒日可飲一斗  
取我頭上巾借君漉新酒醉來我且眠巾仍裹吾首  
世人不肯閒只向塵中走

茅棟漏徙牀不能定

七月二十二日夜

茅棟二百年傳予逮五世間雖稍葺理物久自應敝  
尾落鴛央飛梁欹節枕廢外危或可睹內漏不勝計  
秋高風雨橫點滴俱在背一牀四五徙徙處無乾地  
琴書盡點澆罇壘多垢膩塵侵面目黑滯瀾衾裯棄  
視天頑且冥入暮劇轉厲童子忻無知走水反成戲  
傳云古岸沒復報崩崖隊若海瀾千狂盤渦泡萬沸  
浮來山中物箱篋兼椽柱貪婪恣取材狼藉紛挂樹  
屈指五日前賊濤撼天際海所不及殺復為兩師忌  
嗟嗟東南郡山海稱畧處惟此大不祥天胡殺之易  
聖德良不虧夫乃小民罪有口不敢陳恐遭杖下斃

竹林二首

蕭蕭竹林下聊以娛永日片石漫青苔坐卧有餘佚  
起行捉落花輕風吹入室

蕭蕭竹林下聊為清夜娛涼風吹北戶明月生前除  
有酒且斟酌仰看青天虛

樵歌

白雲在山腰落日到谷口采樵人欲歸長歌向高柳  
借問此為誰青山曰吾友

長林石几亭 以下五首為呂心文作

長林空亭中石几淨如玉白日浣清風蕭蕭萬竿竹  
靜晤者爲誰披雲坦其腹

奉芳亭

獨立寒衆芳春風滿吾手白日倏以馳青山坐應久  
莫惜離披時空然回皓首

松月臺

高臺迥且空宜松復宜月我昔曾詣之松頭積殘雪  
醉起踏蒼苔寒風碎如鐵

有待軒

待花花欲開待月月欲上待客客未來何由豁心賞

青天流片雲深杯落吾掌

薔薇曲

曲徑何逶迤薔薇作青鎖美人摘花戲玉釵骨邊彈  
胡蝶舞雙雙飛來美人鬢

經頂山

寒松韻空山老樹撐白日春風一月來此地轉蕭瑟  
唯有獨遊人萬事皆可畢

秦娥碣

空巖無人聲高碣急飛瀑坐撫江北山脩眉淡青玉  
海氣半欲收松頭見天綠

不見

不見浣紗人空留浣紗石石邊春草痕應是羅裙色

春風知不知年年吹草碧

大樹陰

以下共四首為郭彞舉作

里中多大樹百圍能蔽牛不是樗與櫟九夏清如秋  
我欲借一榻復向溪水頭

禦兒涇

明月照地白越王戰勝處流水嗚咽聲恐是吳人語  
千載怨應銷漁舟唱歌去

斜林笛

僧指牛眠地斜林成古坵夕陽吹笛去牛背穩如舟  
天高野自曠草色空千秋

淨妙鐘

郭村淨妙寺墟煙相早晚晚日下牛羊早時上田坂  
撫枕聽鐘聲家家起炊飯

入江浦縣東城外陳氏竹園

偶然入深竹竟日無人聲欲借此中住不堪通姓名  
環迴溪水綠忽有白雲生

黃崖嶺

白雲舒輕帷青嶂羅重闕曠然出谷口望見江南山

洗眼逢故人自然開咲顏

黃雪幕

香雪疊微黃披帷儼成屋春暮起涼風日吹天氣綠  
使我玉山顏薔薇架如幄

梅花國

嘗聞大庾嶺稱作梅花國花時屢夢游如身置其側  
不意今日來在君谷水口萬樹著寒香千枝帶瓊玖  
上有百尺臺凌風出高柳安得宋廣平賦君調羹手

奧如室

密室稱奧如深深翠微裏焚香讀素書高枕聽春雨  
居此者為誰今之陸內史

淡妝工自理

高樓有佳人淡妝工自理綠鬢寶釵梢素面粉澤洗  
稍璫大秦珠寒光白逾耳下體垂素裳飾身非敗紫  
纖手鳴玉琴絃絃應山水日夜弄寒柎札札響機杼  
空房逾二十選嫁媿知己夫婿托終身因媒通戚里  
初嫁頗眷愛被我以錦綺惠顧恐不終妾心痛無已  
常自省愁尤何德縻君子

豐對樓詩選卷第四

豐對樓詩選目錄卷第五

七言古詩

廣陵陳大科手校共得三百五十五首標為八卷入梓

遊西施洞

遊善卷洞

遊張公洞

謁征西將軍廟有序

荆溪夜行答贈邦憲

晚發桃花渡

錢唐潮

與吳汝復蔣季柔游黃山

與邵偉長將軍葉深父文學遊武夷

舟中聽吳謠

四明山長句

題漢宮春曉圖

為張大司馬題王諤画赤壁圖

為徐文長題九龍卷

題沈周画吳中全勝卷

為王元美題沈啓南画春山欲雨圖

褚生

銅琴篇 有序

瘦馬行

出獵篇 為徐記室與王將軍作

浴鳧池館觀朱邦憲唐子才投高壺詩呈趙太

僕時章

和王元美兄弟賞贍美山亭紅梅玉蘭詩

輓陸太學思豫 有序

莫雲卿席上聽琵琶歌

送方國華北上

送王四仲房歸鄆郡

賦得美人行送向師悅北上

送呂山人中父

送張孺毅北上

送人還黃山

送余廿二君房赴揚州

建溪送別葉深父

建溪送別偉長將軍赴南海

寶刀行送從子肩吾會試

送馬明府叔明之桂林靈川

送屠長卿十四秀才赴太末



至日同朱邦肅朱伯傳朱仲敬過顧汝和王泓  
館觀唐玄宗手書所作鵲鴿頌卷顧汝脩在  
座

豐對樓詩選卷第五

甬句東沈明臣嘉則父著  
從子沈九疇箕仲氏選

七言古詩

遊西施洞

窈窕西施越溪女浣紗石上嬌無語朱顏羞死芙蓉  
花句踐聞之還竊喜救成妖豔美且都傾城傾國真  
名姝一朝進御吳宮裏粉黛三千泣不如吳王得汝  
惟情密白晝為宵月為日水殿雲樓接洞庭醉中不  
覺姑蘇失我家亦飲苧羅水與汝千年共鄉里一自

吳亡竟不歸煙水茫茫何處是故鄉知爾思悠悠月  
缺花飛春復秋土花蝕斷寶釵股石髓膠殘金鳳頭  
即今古洞我來遊夢裏襄王空見求鐵笛梅花三弄  
曉欲乘范蠡去時舟

遊善卷洞

昔聞善卷薄天子不受舜禪來迹此赤符使者何處  
尋百尺清潭洗其耳遂令此洞名善卷上乾下水三  
洞連幽深竒絕不可狀秦人空把桃源傳欲呼太白  
題長句南山之作唯韓愈我才薄劣柰爾何落筆恐  
遭山鬼怒小洞千秋玉作泉石髮十尺浮龍涎呀然

一罅坼壁底深黑獨許蛟龍穿古時墮石不敢墮王  
柱下垂三萬箇倒挂蒼藤挈巨壑苦吐神飛膽驚破  
從南更轉九斗壇壇迴陟覺飛青湍白龍蛻骨幾千  
段峯竒崆崆復萬盤谷虛水急錫鐘鼓崖馳壁走獅  
象舞欲滴不滴排乳窠有聲無聲濕晴雨水田壘壘  
仙人哢玉禾黍黍何年生黝深湏洞不可測誰持照  
水犀而行近聞御史頗好事東版為椽討魑魅白日  
老龍不得眠厲風怒水驅軍吏伏流倒向小洞奔却  
疑人世非乾坤胡麻之飯流未出凡人豈得尋其源  
想當鴻濛欲判割壁之大冶洪鑪執金鎔百沸幻泡

奇。清水經風盡凝結。不然胡為妙莫窮。水晶鏤刻珊瑚空。月中疑無廣寒殿。海上豈有蓬萊宮。石洞參差疊樓閣。巨靈六丁不敢鑿。我狂欲借天斧開。割裂山皮觀厚薄。上洞更奇何所無。石床丹竈金玉符。萬竅瑩瓏嵌鬼面。千神怒勇擲頭髓。山僧把炬為前導。顧盼茫然唯大叫。奔騰飛舞詫神奇。戲鬪笑哭窮天造。最怪中撐玉筍長。仙鼠夜放明珠光。豈是仙人未離食。米鹽尚積千年糧。洞外春風寒刺骨。洞裏氣蒸汗濡髮。路深火短不盡遊。隔斷仙凡真恍惚。出門磨石題姓名。古苔落粉青花明。同曹呼酒且一醉。世間萬

遊張公洞

事皆浮萍善卷所以棄天下。我亦胡為戀鄉社。拂衣從此種桃花。欲上青天騎赤馬。

昨日游善卷。已謂天下無山川。今遊張公洞。千驚萬怪疑為夢。嗟我壯心欲與山爭雄。大肆筆力天無功。乃今欲着一語不可得。始知天地之勝唯有茲山鍾。我昔探禹穴。又曾躡武夷。武夷峻削禹穴古。那如此洞幽而奇。張道陵。柰爾何。何年到此騎青驪。我今呼爾問踪跡。爾去人間爾誰識。丹鑪無火石牀寒。唯有空山萬拳石。萬拳之石何纍纍。幻形變態將胡為。造

物無以顯靈異。故此劇戲令人疑。山靈欲悶悶不得。  
天公為之驅霹靂。一斧劈破神鬼愁。遂令萬古青霞  
坵。巨闕前開後通竇。暗中一線青天漏。離奇詭怪萬  
狀陳。寶藏龍宮與天開。兩崖歎又愁。攀援側身却走  
脚。在肩。恰訝崢嶸亂撐拄。把炬自照行難前。石色黝  
然堆古澗。膩滑十步九步失。乍驚墮落千仞坑。又詫  
飛騰九天窟。燎滅燈昏只尺迷。萬轉千盤無路出。丹  
砂夜照鬼燈紅。自有乾坤無白日。劃然一隙通天明。  
羅列萬戶排層城。頃足大叫舌不縮。是誰槌碎瓊樓  
傾。長廊飛來駕巨壑。脩簷掀突歎朱楹。橫撐直豎互  
糾結。纏綿雜沓皆相成。玉柱墮地不到尺。瑤棟挿天  
懸半壁。寂若閉門閉落花。閑如綺戶迎仙客。險逼重  
關鎮華夷。嚴同帥府森戈戟。石乳綠結千年苔。又如  
五色蓮花開。佛手擎雲不可摘。玉芽迸筍何人栽。蜂  
房簇擁參差向。短者五尺長者丈。低張白玉雲母屏。  
高塞素錦芙蓉幃。盤盃積水寒玉膏。掬之洗眼明秋  
毫。恨無金丹煉紫石。出門空嘆朱顏凋。吁嗟乎平生  
之性嗜登陟。茲遊信足償吾癖。一掛萬漏不敢辭。聊  
著狂言作遊籍。只恐五嶽之高徒。在青雲中。猛然欲  
去無長風。不如坐石投壺喚玉女。把酒一醉酬張公。

謁征西將軍廟并序

嘉靖丙寅冬同朱邦憲至宜興偶過謁周將軍廟時提督軍務都御史張公使人打碑廡下縣官又具私馬數百蹄為驛以應部使者臭穢不可入謁罷愴然退與朱生各賦一詩

紀之

義興縣東城北隅蕭蕭古廟田中居入廟看碑識周處壁間仍有晉時書陸機文義之書高題英烈將軍額中丞好事來打碑墨花未透水凝石首尾猶存數十行字跡剝落經幾霜中間欲讀不可得使我感慨

徒悲傷况聞上司索馬騎縣官供給先點齊東西兩廡古碑下聚卒立馬千百蹄嗚呼城中萬家邑豈無一室容馬立烏騅赤兔向風嘶豈是將軍戰歸日樞衣上殿知英雄階前下拜生悲風竹色松聲自虛壁積雪故照殘陽紅嗚呼將軍一何武斬蛟射殺白額虎折節終成文武才按劾不避權貴怒五千孤旅戰梁山猿竭矢窮知死所形容何必丹青傳燁燁精靈照今古神遊暗八極殿宇今摧頽屋後青山塋衣甲敗垣春兩無花開嗚呼三塚纍纍宛相似老樹千年半凋死墓田冷落幾家畊一泓野水秋風起同遊正

與朱生來朱生慘然吾亦哀問我他年如作令封墓  
式廬崇祀敬先賢廟貌委塵埃縣官不知無乃病風  
紀人心國之命前典無存後何鏡却笑朱生真太狂  
先向山人問為政

荆溪夜行答贈邦憲

與君夜進荆溪路風雪連宵斷人過山空老鳥噤不  
啼萬壑寒聲撼天墮地凍石滑水嚙船十夫牽挽無  
能前憐君氣猛不肯歇打鼓發譟呼朗月忽驚朗月  
天上來雲盡高寒照空雪月光雪色何離離仰天長  
嘯風淒淒與高索酒飲一斗景物入手縱橫題題成

自謂鬼神助何如枚馬梁園賦勝事須憑彩筆傳繡  
口能將錦心吐玉女朝天不画眉仙官謁帝真披素  
人世何憂不識君只恐天愁鬼靈怒擊劍狂歌歌且  
舞為君大賞荆溪語一字償君一斛珠世上黃金賤  
如土

晚發桃花渡

三江日出水如煮桃花渡頭動風雨毒龍駕雲海上  
眠老蛟挾雷波面舞瀆吏風定雷雨收戰罷塵清息  
鼙鼓鼓柁江流水尚渾雲脚城頭日斜吐青林潮送  
白沙灣白布帆行赭山樹一重一掩翠屏高回首江

園隔秋浦

錢唐潮

低昂天地分高厚何年何日何人剖元氣茫茫直到  
今瀛海洪波必先有大禹當時入會稽錢唐之潮古  
來久不知此水孰推移地軸翩翩若權蹂倏忽噴薄  
天馬嘶往來日夜空雷吼豈是饑蛟鼓怒腮定應痛  
觸虬龍首排天濁浪萬里橫濺日飛濤千丈走乍驚  
白練亘遙空久注銀河傾北斗海門飛動雪痕微江  
岸激迴山勢陡黑雲濕壓長城頽黃沙塞斷飛狐口  
長風滅廓詫神奇急雨奔騰失前後耳驚目眩心膽

雄南鵬北鷗俱莫守端倪不測機頗玄我欲因之問  
莊叟只恐崑崙徙向東四足之鰲不能負潮兮潮兮  
柰爾何無乃天公弄蒼狗須臾看罷江水平一片斜  
陽挂衰柳

與吳汝復蔣季柔游黃山

吁嗟黃山兮何獨三十六峯而已乎龍蛇盤盤走千  
里青蓮萬朵浮江湖元氣茫茫闕日月吐雲納霧滄  
溟枯嗟吸陰晴散風雨水分楚越通三吳青鸞躡蹠  
舞勢歇雲門闔闔誰能呼咆哮獅子吼孤月千年桃  
花知有無常聞軒轅帝容成與浮丘丹成八甲子白

日昇天遊。寶函玉壺。渺何所。空聞三十六源春水流。  
將王孫。吳夫子。吾今與汝來。共洗清溪耳。相逢有酒  
當笑謔。唯有劉伶達生死。吁嗟兮。黃山汝胡不為平地。  
今為平川。蟲蟲乃在青霞顛。使我側身望之。徒茫然。  
有翼無風。空可憐。容成子。浮丘伯。喚不來。招未得。黃  
帝深深居紫極。寄語世間人。莫鍊丹砂石。不若手持  
蒼玉藤。挂破青天九秋色。

與邵偉長將軍葉深父文學遊武夷

丹梯倚天天欲赭。九曲青龍走其下。崩訇石扇窈窕  
開。鴻濛之初誰鑄瀉。崢嶸峭拔何處來。夫乃三神之  
山。從霹靂而化者。剛風割雲劍戟嶺。古鐵磨空日月  
寒。恍驚天孫錯剪錦繡段。又疑胡雛跪獻珊瑚盤。蒼  
壁橫開欲千武。錦屏高張如百堵。幽怪虛勞說幔亭。  
瓊瑋無能過天柱。瑤草青葱冬不凋。白鹿可馴鶴可  
調。當時毛女杳然去。洞口春風空碧桃。余也本狂士。  
十年三到此。欲起武夷君。為之扣終始。武夷之君今  
已死。十二真仙竟誰是。子騫頭顱墜空山。我亦因之  
罷憂喜。邵將軍。葉夫子。經營天地將何以南。平百粵  
駕樓船。七尺龍泉電光紫。請君揖謝武夷君。稷契巢  
由那得聞。橋邊黃石知心事。未許清溪弄白雲。



舟中聽吳謠

孤舟夜傍垂楊底。新月半天明。綠水楊華。盈盈白露。垂長風。吹入孤舟。裏孤舟。孤客眠未成。欹枕自釋吳歎。名不是江南采蓮曲。即為子夜四時聲。落梅何處。飄晴雪。折柳關山。腸斷絕。艷情逸響。誰不憐。哀玉悲箏。悄然闌。輕似遊絲。惹落花高如急管。悲秋月急管聲聲。叫入雲。落花無力。委紛紛。誰家嬌女。不懷春。何處妖童。不愴神。自解江臯。交甫珮。定窺東壁。宋家隣。窺隣解珮。何時已。錦水鴛鴦。結羅綺。芍藥傳心。鄭女嬌瓊玖。報恩衛妃死。當時玉樹後。庭花一曲未終江。

月斜

四明山長句

李白夢天姥。煙濤茫茫走東魯。隨風吹墮禹穴來。萬里心魂挂瑤圃。興公賦天台。赤城霞氣標蓬萊。五采肝腸濯翠海。九天日月披銀臺。四明之山誰所鑿。天公為我開樓閣。雙牖高看烏兔飛。四窓平見星辰落。青雲冥冥豁洞天。使我坐闌心茫然。手捫白虹不到地。眼睹綠雪吹春煙。九州點破黑子大。滄海東窺一衣帶。天上銀河貼面流。神遊八極吾將柰。千秋閔跡人莫尋。萬古靈踪此真快。二百八十峯。天簇青芙蓉。

丹山穴紫鳳。赤水蟠黃龍。氣雄五嶽掩天柱。勢奪十  
洲凌閭風。不周山崩誰所觸。祖龍沙丘不敢哭。騎龍  
跨鳳訪仙曹。朝向崑崙暮王屋。願呼樊夫人。為我謔  
且舞。手拍洪崖肩。醉枕亦松股。璿房瓊室七十二。恐  
是蓬壺世難睹。雙雙帝子怨蒼梧。穆王馬蹄知有無。  
金書玉簡秘不得。越水至今流禹都。

題漢宮春曉圖

大風謔兮高長歸。沛上父老生光輝。四海山河一家  
土。太平忘却白登圍。文景富庶四十載。後宮縈皂無  
繒絲。可憐後帝恣懽娛。制度紛紛盡更改。甘泉長樂  
遙相憐。終南渭水豔陽天。金屋沉沉春似海。阿嬌未  
老衛夫憐。昨宵曾醉昭陽殿。飛勅明朝開早宴。宮監  
點名夜不眠。妙舞誰能過飛燕。銅籌欲盡未央時。流  
鶯已在垂楊枝。綺窓繡戶綠煙裏。太液池水融胭脂。  
玉面桃花鬪顏色。紅雲煖夾梨花白。料峭東風脆管  
絃。樂府新翻先暗識。私將珠玉賂中官。多方欲買君  
王懽。辟寒金落誰人手。含羞欲進嬌盤桓。殷遙聞  
雷暗響雉尾紅。開雙扇。掌青眸。皓齒列三千。一將  
名親疏。上君王寵愛。忽更新蛾眉。都帶西施顰。承恩  
今日當筵者。莫問秋風團扇人。

為張大司馬題王諤畫赤壁圖

長江漾渺吞吳楚赤壁臨江照今古洪波舂天山欲  
搖白日坐見蛟龍舞當年戰艦江面排鐵鎖連環摧  
不開曹瞞橫槊訶聲起烏鵲不飛明月來眼中已無  
吳與蜀雕戈冷拂天霜綠周郎年少方戰酣一炬東  
風魏兵哭火光歆與咸陽高炙天煮水魚龍焦黃州  
渡口孫吳喜黑松林外曹瞞逃人生得失及掌間英  
雄萬事空江山江光山色千年在風流勝事如相待  
團練官閒蘇長公與客携舟汎蒼鶻兩賦名垂日月  
光至今不知得幾霜錦衣畫者名王諤揮毫十尺懸

高堂

為徐文長題九龍卷

羅刹江頭雨如注海門簸蕩搖天柱山氣稍開風稍  
微黑雲漸薄疑初曙山陰故人徐孺子作客來住吳  
山東與余相違九月強一見街頭問行李要余入山  
具酒漿酒酣劇談神鬼僵拂拭松窓出縑素開卷灼  
爍驚電光電光炯炯眼花亂九龍爭飛在天半雲奔  
水走翻低昂海若天吳競奔竄滅漉長風肘後生崩  
轟霹靂天為傾變化隱約不可狀霧涵濤真鱗甲明  
昂頭露爪令人悸雙飛獨舞俱成勢天地為之清濁

移海岳須臾驚捲去徐生把酒索我題搖筆不敢輕  
為詞脫中大叫問所以濡墨噴水知為誰當時画者  
陳公儲百世獨步誰復如即如此卷亦不易摩挲使  
我空躊躇嗚呼画龍尚可惜魚服塵中更誰識出門  
長嘯風雨涼萬壑淋漓翠猶滴

題沈周画吳中全勝卷

生平慣作吳門客遍歷吳山浮震澤盤閭門外石湖  
前日買蘭舟弄秋色長洲竹樹摠煙霞茂苑池臺半  
阡陌姑蘇山上吊吳王館娃宮廢雲空白玄墓穹窿  
雪裏登澄照天池月中識最憐窈窕越來溪春風萬

樹桃花迷茶磨嶺頭逢日出那見山下聞鷄啼紅泥  
亭子誰家館赤欄橋伴垂楊縮少年行樂苦日短響  
鏗無廊月空滿洞庭雙髻青螺山望之只在斜陽間  
微茫天際渺然去一僧獨載春波還野寺幽尋九幾  
處蕩槳遙穿雨中樹即今夢寐在蘇州恨不移家太  
湖任爲登白岳過君家高樓滿貯吳中花細雨焚香  
出縑素石田老子尤堪誇繭紙橫裁盈五丈開卷煙  
霞起屏障畫寫吳中勝槩奇我身已在胥江上願君  
沽酒向高閣使我携之破寥廓况復秋深月色清何  
如艤棹楓橋泊

爲王元美題沈啓南画春山欲雨圖

東風吹暖海氣惡黑雲推山白雲薄眼前疊嶂埋峯  
頭水北高林穿日脚鶉鳩亂啼花亂飛溪漲濃嵐雨  
將作欲來不來天半昏似將混沌疑乾坤推移不識  
上帝意猛虎如排閭闔門九閣不扣玉女泣天吳播  
蕩江湖立電毋樵傾霹靂遲但見烟霏草頭濕芙蓉  
山前茅屋低東陽老子開剡溪筆端欲奪造化力倏  
忽雨氣生淋漓詩成繪了已寥廓天高地下還清濁  
花明樹綠呼酒來怪無客至相酬酢百年遺墨塵眼  
空神物今歸王長公長公兄弟把相示醉後揮毫姓

偶同

褚生

洞庭無雲水光碧君山仙官起吹笛呼龍畊煙種玉  
禾喚鶴開門款丹客壇上松花黃雪積門前芝草長  
一尺白石爛煮砂粒紅青精欲熟鑪煙黑日高垂簾  
誦黃庭燕壘香泥落空壁

銅琴篇

有序

吳仲足携族子德望所藏銅琴示我爲賦一  
百八十九字盖余平生耳目所未睹記

青銅合體黃金相軫以白玉排鴈行絲彈蜀繭啼鳳

皇誰其作者古帝王按圖考識題大唐壘文雙篆鳴  
王方玄宗協律精宮商豈當在御樂且康伊昔抱至  
置我床青天拂匣開錦囊白日倏忽相低昂翡翠照  
爍琉璃光丹砂點漆流星芒纖指觸絃響嗶嗶蒼梧  
飛雲頽不揚見者黯黯頽而長延陵考國推大章裔  
孫寶秘十襲藏明珠大貝俱尋常荒墟斷磧經千霜  
鬼神呵護不敢傷天地不得闕厥良復使人世窺虞  
唐我欲薦之登明堂九原誰再起師襄夔孔同室國  
祚昌皇帝萬歲永無疆

瘦馬行

竹批夾鏡鐵連錢四蹄蹴踏胡雲穿昔從沙河戰百  
合今歸瀚海馳三千風高雪深草枯落鐵骨蘭筋卧  
寒壑滅影流光空寶鞍翻雲掣電虛金絡首蒼蕭蕭  
春未生主人情重長哀鳴伏櫪稍寬奴隸手秋來還  
去奪番營

出獵篇為徐記室與王將軍作

秋潦始歇天空明太平門外無人行沙岸風迴草頭  
短兩脚射日黃雲平吳山南吞海壖盡百里平郊江  
潤潤轅門大旗飄淺黃游擊將軍試鷹隼拜邀記室  
觀獵場古之徐幹今文長夾鐙提鞭上馬去白羽挿

房金幹香將軍令嚴壯士猛龍飛電掣無留影但聞  
怒怒兩耳聲飛鳥應弦狐兔屏徐生氣豪心膽雄直  
欲萬里追長風崆峒扶桑挂眉睫紫騮四足輕飛鴻  
老瞞黃鬚握齷子橫槊賦詩安足齒學書學劍萬人  
敵一雙瞳神秋水碧今為楫客坐籌邊開口何方吐  
奇畫將軍夜行何所為短衣射獵南山陞北平太守  
斬醉尉胡乃盡為緣數奇聞君亦向田間飲割鮮擊  
缶醉欲甚袖毫自製羽獵篇半夜長歌不成寢

浴鳧池館觀朱邦憲唐子才投高壺詩呈趙太

僕時章

高館澄波沉綠雨唐生選勝邀賓處桐花未盡燕樓  
梁小錢貼池百舌語堂中玉壺高丈許兩雄對壘誇  
長枝矢聲落鼓春漏遲酒滿玻璃寒玉乳鏗鏘迸地  
墜流星貫耳穿心驚復喜負徒就飲攬長纓饑蛟注  
海吞無聲勝者張旗鼓餘勇把箭似欲摧長城伸臂  
仰天目不瞬卷鞞大白仍自進咋指揚揚意獨矜卬  
郵道上逢廉藺白日欲隨芙蓉溪柳稍新月生天西  
出門賓主俱大醉僕先還碧玉蹄

和王元美兄弟賞瞻美山亭紅梅玉蘭詩

三月三日天氣晴東吳花事何縱橫王家園亭最奇

絕千樹萬樹啼流鶯流鶯宛轉春光膩玉蘭紅梅眼中刺瓊花照人高入天絳雪可餐紛滿地瓊花絳雪柰愁何紫綬霓裳天上多穠李天桃盡凡品不數嘉州優鉢羅招邀群從遊花下大嚼豪吟摠風雅神情散朗故名家連枝高會真飄洒几席疑陳曲水前風流絕勝永和年右軍手搦如椽筆墨瀋淋漓醉後傳

挽陸太學思豫有序

思豫文裕公儼山先生子也以蔭補太學博學宏才負時重望屢試不中嘗聞兩為忌者排落云故與余善時與余遊郭外見余賦詩

乃把余手曰陸生何人邪余曰君乃佳公子賢豪人也陸生跽曰余乃沈明臣榜進士也後一年竟病死又二年其嗣子郊從余授易去今已十七年矣知己下世余亦淪落撫時

追往攬涕成詩

陸機才名天所忌兩魁南北皆擠去絳灌從來惡少年英雄那得稚高第哀君恨骨高里填知己獨抱文章冤君應地下慨白日我猶世上疑青天青天白日不可返生者徒將死人輓流水東流去不還過君故里青山晚學士門墻高入天青雲忻有後人傳當年



醉酒狂歌地紅滿攪瑜玉斗前

莫雲卿席上聽琵琶歌

莫卿乃是豪俊徒兩眼睥睨天欲無少年文章屈董  
賈不肯折節為小儒結交海內多長者四座上客懸  
明珠錦筵高張列華屋閒房喚出秦羅敷脫衣搥鼓  
痛處士使酒罵坐容灌夫主人起舞客大醉花影零  
亂搖金鋪合尊促坐燭復明小結六尺雲母屏美人  
一奏琵琶行銀箏錦瑟俱停聲哀絃寂歷雍門泣緩  
指森脉春波平楚詞吳歛越謳并霍然罷奏四壁靜  
古聲悠悠今樂悲頓使文侯睡還醒漢庭公主嫁烏  
孫嗚嗚咽咽啼聲吞秦人長城苦行役斷盡閨中未  
死魂嗟余多情亦多怨相思淚結桃花片月落鷄鳴  
香粉銷別有風光貯西院

送方國華北上

君不見馬相如尚書給筆賦子虛建節冉驪何赫奕  
歿後空傳封禪書又不見楊子雲石渠侍從揚清芬  
草玄復作美新論投閣之耻千年聞故人方君天下  
士辭賦凌雲馬揚比忽聞辭我遊帝都高名已動京  
師裏京師豪雋知爾才定應結內同徘徊骯髒不與  
俗士合秋風長嘯黃金臺黃金臺高百尺紫霧紅雲

幾重隔昭王已葬燕山中  
按劍翻嗔投白壁吁嗟乎  
曼倩不沉銅馬門那能割肉遺細君漢庭不議叔孫  
禮那得黃金賜遊士大鵬奮翮揚赤霄匹夫一言取  
青紫我思郭有道千載真吾師臨風想折角愴然爲  
之悲君今有素琴爲我彈一曲解我雙愁眉母勞嘆  
空谷我歌行路難歌罷慘不歡且弄滄江月莫作離  
別嘆四明山頭霞可餐何年歸來共盤桓我今只欲  
釣滄海烏得百尺珊瑚竿

送王四仲房歸鄞郡

嗟余落魄四十載名在青山老東海  
翫辭空憐一片心今日對君詞慷慨  
王先生知爾乃是人中英鳳麟  
不瑞世天地爲之傾王先生柰爾何  
五十徒然守文字古來憤懣英雄多  
憐君懷寶邯鄞賈握齟公卿何足數  
獨携肝膽向天涯握手傾心友屠酤破產不言家  
已貧結懽盡是賢豪人道逢擊筑吹篪者便與一  
醉都門春雖在風塵中却有神仙骨燒丹十岳間煉  
藥三山窟白日思騎玉鳳飛青天欲跨蒼虬出季布  
重然諾劇孟朱家儔仲連天下士無乃王生侔與余  
一見錢唐上謂余任俠心相投屢月陰晴事徵逐携  
錢數過酒家樓論心不在古人後撫掌大笑輕王侯

今日飄飄別我去挂帆歸指黃山路高堂前月寄書  
來眼穿遊子烟村渡王先生柰爾何飲君酒聽我歌  
莫愁白髮空蹉跎猛氣直欲吞黃河君不見挽白日  
魯陽戈

賦得美人行送向師悅北上

吳江水綠楊花白美人欲去情脉脉南風吹船向北  
飛我欲留之不可得美人去去青天中霧閣雲窓三  
萬重燕姬趙女總殊色何人最是如花紅如花紅信  
難比王嬙昔在漢宮時隔却重門萬餘里美人畫眉  
長短間玉盤粉面堆青山妍媸自別有明鏡臨妝慎  
莫啼紅顏君不見東隣幼女事豪奢選婿嫁與王孫  
家王孫置妾滿華屋愛不崇朝多反覆又不見西隣  
老女嫁田夫朝向田間暮事姑不及十年兒女大別  
離怨曠一生無

送呂山人中父

與君同庚復同里四十五年才識爾相見鬢憐在異  
鄉相親頓覺如兄弟君家春鷓忘急難我家堂前紫  
荆死一言一哭一聲悲君淚如珠我如水即今別我  
去何方自言只在乾坤裏乾坤茫茫海岳長邛得扶  
搖大鵬起昔年嘗走齊魯間紫霞高冠白雲履兔園

上客比鄒枚長揖侯王傲天子俠骨能令壯士香高  
懷可使狂生耻酒酣詞賦欲凌雲墨客騷人盡披靡  
歌聲振落太山雲夜半登顛脫雙屣醉擊秦王無字  
碑長嘯大呼呼曰你你是秦人爾汝稱漫罵祖龍何  
有耳君乎豈是浪遊人墮地何慚射弧矢豪傑生身  
天地間只合從天任驅使乃今落魄不逢時豈肯低  
眉窺指眦我今沽酒對君惟莫謂無能報知己

送張孺毅北上

昭王築臺禮郭生樂毅下齊七十城燕太子丹報秦  
急荆卿匕首函關入易水浩浩金臺荒君今何處尋  
田光我今送君君別我君應思我燕山下燕山九月  
秋風高黃葉飛飛打君馬君騎馬出燕市中倘逢擊  
筑酣歌者高漸離氣何壯擊筑更衣坐堂上即今豈  
亦有斯人為我慙勤問無恙風塵漫漶天地昏感激  
願與君同論近聞左右除鼯鼠堯舜一洗新乾坤乾  
坤新日月朗四海賢豪思抵掌當朝元宰用奇才一  
日薦賢蒙上賞君才磊落空人群纖離逐隊成錦雲  
八尺之龍豈凡廐我亦忼慨生訢訢君去矣我持杯  
杯乾月落潮已迴明朝望月知何處江樹離離江水  
隈

送人還黃山

時客揚州

廣陵城頭夜鼓急罷酒停絃起長揖明日邗江一送  
君風吹憤淚青天濕嗟君乃是天上人不合下謫隨  
風塵氣高才大不得用譬之縛龍鍛鳳鞭麒麟憶昔  
結交破產為俠客黃金十千如瓦擲當時酒伴皆不  
來不肯大書翟公宅空囊奉母還故鄉石田破屋黃  
山莊雙眉不解向人皺擊劍鳴環謔慨慷短衣躬畊  
給妻子白眼睥睨天蒼蒼束書新草左思賦著就十  
年人莫顧願將副本藏名山閉口不問長安路昨日  
投詩別我行靈蛇在手人共驚十襲藏之不敢發水

行只恐蛟龍爭噫吁噫為君且泣還且謔漸離其李  
荆卿何我欲洗此濁世波與君舉手挽黃河黃河九  
曲九萬里可憐齷齪猶自多欲謔行路難塞耳難聽  
心自剗蜀道不為險三峽無波瀾誰家紫荆樹青棘  
森攢攢我昔蒙大難長夜不能旦起讀鴟鳩詩寒星  
耿河漢嗟哉恨填胸深與溟渤同精衛口流血啣石  
填海中海不可滿石不可窮壯心未已天地為終白  
波摧山撼天風丈夫世上誰雌雄赤日為之貫白虹

送余廿二君房赴揚州

春寒兩積千里陰高江水漫天沉沉余生辭我刺船

去濕帆不挂烟濤深憶昨我經揚子渡花愁顛風柳  
愁霧二十四橋無處尋漠漠空江沒瓜步今年君亦  
去揚州送君別君立江頭願天放晴快君意白日大  
照平江流此時揚州好風色金山正對瓜州碧故人  
從此向邗溝騎馬雷塘訪遺跡雷塘遺跡不可聞隋  
家遊苑今荒墳樵牧牛羊落日裏異代誰憐亡國君  
亡國之君何足數君本賢豪復年富蕪城春色借光  
榮淮海山川待詞賦我懷古人當再陳李白散金如  
散塵三十餘萬一年盡落魄公子來相親城南酒樓  
今尚在姓名不逐乾坤改勸君酌酒揖江雲莫道英  
魂隔千載

建溪送別葉深父

葉生讀書四十強少以博洽凌詞場頭白安能事筆  
硯拂衣自起磨干將投筆願為班定遠三石強弓手  
能挽丈二之組繫單于封侯莫咲書生晚去年鄉書  
薦高第走馬長安求一試塌翅迴谿今且歸收復桑  
榆成大器與君傾盖當武林南行共泝錢唐深橫海  
將軍君好友爾我頗得披冲襟匹馬穿雲楚山濕怒  
石奔湍建谿急夜涼飲酒坐船頭月射秋虹水光立  
洒泣別君君且休丈夫意氣輕王侯浮雲富貴豈難

致請寶腰下雙吳鉤

建溪送別偉長將軍赴南海

將軍才抱文武全起家射策漢庭前身經大小百餘  
戰渤海功名常在邊歲歲防春垂廿載壯心不變頭  
顛改封侯盡是故等夷自憐蟣虱生銀鏡惹惹終明  
馬伏波謗書其柰樂羊何一朝天子賜金印南向蠻  
天下尉佗雲中魏尚還為守北平李廣仍垂綬萬騎  
春雲五嶺頭千艘夜月三江口五嶺三江天地清樓  
船元是漢家營腰間寶劍雙龍起帳底玉笙丹鳳鳴  
偶投南徼同君行將軍不肯輕書生致詞邀我羅浮  
去莫待梅花落遂聲與君把手向君別請君視我張  
儀舌欲上任置百尺樓為余先掃藍關雪

寶刀行送從子有吾會試

我有寶刀長尺五佩之十年共辛苦蛇皮作鞘玉把  
頭金環緊繫青絲組光奪秋霜照膽明刃可吹毛白  
虹吐礪鵝膏淬昆吾精陰山鬼哭并州土銛能切玉  
如切泥水割鯨鯢陸犀虎我家阿咸文且武萬言三  
上千明主解贈腰間動風雨一片雄心鐵花古揖別  
西郊謝諸父但願清時用干羽

送馬明府叔明之桂林靈川

荆雲搖白蒼梧秋荔江水淥天如油鄂侯青雀渺何  
所翠被榜人空越謳茜裙莎草黃陵女舜廟堯山怨  
春兩舊淚猶斑新竹枝今月空懸古時樹九疑崔嵬  
白雲間洞庭風起波連山極目蠻天帝子怨斷腸芳  
草王孫還明珠曉濺鮫人室哀絃夜鼓湘靈瑟往事  
千年不可知青削芙蓉天外出重江睽嵐帶青羅瘴  
煙毒霧浮牂牁荒荒日落獠人洞夷舞蠻謳柰若何  
使君銅章鞞玄纓漢室循良推卓茂不辭五斗迎督  
郵寧為丹砂乞勾漏終日鳴琴不下堂屏風定取列  
星卽靜窺案牘榕陰綠退食公庭蕉子黃秋高鴈斷  
衡陽晚萬里題書莫辭懶故人江閣楚天南政成無  
事須強飯

送屠長卿十四秀才赴太末

春江沉沉兩聲歇布帆十丈明於雪迢遞青山江樹  
稀送汝扁舟向姑篾姑篾城頭花未齊偃王廟裏鳩  
初啼高灘水落舴艫急潭黑龍眠雲霧迷千峯萬峯  
月出際倚樓思君讀書處讀書蚤已破三墳出語春  
雷轟九地莫將草色怨王孫莫道無人日倚門定知  
見橘懷來早香撲高堂春酒罇

至日同朱邦肅朱伯傳朱仲敬過顧汝和王泓



館觀唐玄宗手書所作鵲鷓頌卷顧汝脩在

座

至日起傍寒梅枝海霧塞天黃日遲客懷磊落無一事過訪辟疆煙水池玉泓高館立池上潛魚起沫春光熙主人翰墨咤填委金薤琳琅紛陸離自言新從帝鄉返買得至寶函持携錦絲十襲啓未竟陡覺焜耀光芒馳薔薇露水濯我手緩舒細卷開雙眉開元小璽竟半寸楮墨空處緘龍螭文章煊赫驚雷電筆力遒勁迴天倪口吟目覽手畫腹驚喜不覺花磚移開元之初賢帝主長枕大被真怡怡薛王壽王各醒醉春令之頌非此時瑤殿瓊枝幾千樹小鳥百萬鳴飛隨花萼樓前好風日豈如田氏紫荆竒異世傳來宛然在可憐不載魏鄉詞想當落紙春風處祗應未使王環知

豐對樓詩選卷第五

雙魚對樓詩選

卷五

二五

豐對樓詩選目錄卷第六

七言古詩

佳公子行

留別吳邵武明卿

別贈吳山人子充

留別吳子荆九客館

憶昔行留別朱顧二子

遠遊篇贈梁六伯龍

贈紫霞山人歌

贈俞士行

賦得廣陵濤贈李紹植

贈嶺南張邦聘秀才

贈金將軍進父

太霞山人詩贈周郡博象賢

訪顧願父因登大石醉中作短歌贈之

雙珠篇贈王受吾連舉二子

戲贈楊伯翼

與君房對酒歌

賦得紅藥翻飲箕仲

花前酒謠勸飲者

以葉生太叔詩呈張大司馬

賦得狼山絕頂遇大風雨歌送顧益卿按察北

上

夢中作

江上月夜懷黃孔昭因成短歌

留別林通州登卿

醉卧偶作

賦得靈峯洞行荅袁黃巖見寄

為王元美廷尉題梅竹雙清卷

庚辰五月十六日集青浦署中同田叔開之百

穀

五豪歌

吳生行贈叔嘉

明霞篇

大鄣汪生行寄贈伯耳

有序

題周秉忠寫春山欲雨圖為傅七明府作

十月望日沈虞部王別駕邀同徐明府沈舟太

湖看落照至夜午還浮玉洲看月詩

送沈尚寶純父北上長歌行

孫禹錫溪上雙藤歌

孫生行贈禹錫

高生子游行

蔡府主爾通祖公遣小史以手書俸金為賜兼以民瘼下詢臣不敢有所陳對謝以長歌一首共三百八字

長歌行贈汪伯玉司馬

醉歌行贈汪仲子仲淹

豐對樓詩選卷第六

用句東沈明臣嘉則父著  
從子沈九疇箕仲氏選

七言古詩

佳公子行

潘郎佳公子意氣良足欽結客多長者阿堵無黃金  
朝開珠履館莫宴清華林嬋娟故婉婉金谷何沉沉  
高閔隘車騎錦陌馳纓簪欲傾金張客願輸羸亥心  
柰何日月改庭柯變鳴禽翻憐少年事自謂不如今  
折節下甕牖矩步憲儒箴華堂散緗帙丘中理鳴琴

朗朗照秋水暢然振流音眉宇澹玄度意色殊蕭森  
嗟余皓首落魄士不覺坐嘯開冲襟問君何時一鼓  
棹千里雪夜來山陰

留別吳邵武明卿

諸侯不下士大夫不親賢此事蓋已久俯嘆心茫然  
使君古諸侯愛客何翩翩濁世佳公子磊落青雲前  
我來客昭陽五馬時周旋下榻欵孺子倒屣迎仲宣  
欣賞高士識玄談達人篇余病禪棲更日月使者相  
望大道邊知君好士若饑渴使我感激彈哀絃夜半  
起擊珊瑚鞭自顧腰間雙白蓮耳後雄風生颯然爲  
君報稱知何年浮雲層層落青天霎眼不見空人憐  
余歸山中弄紫烟東海詐云無但道君能舞且能  
楚謠陽春白雪知音則那高天落日愁正多鯉魚吹  
風生白波閩溪清清奈人何

別贈吳山人子充

山人偉然丈夫子雪髯脩幹乾坤裏一劍曾穿五嶽  
雲雙眉尚挂龍湫水昔年長揖游帝京雄譚繡筆凌  
公卿眉睫之間眇天地七貴五侯驚姓名明時獨抱  
籌邊畫自能談笑清疆場萬里胡沙仗馬箠曾連終  
謝將軍客黃金結客家故貧歸來不對妻兒嗔仰天

長嘯看白日濁世豈掩英雄人避亂移居治城裏長  
吟閣靜春風起建業青山高枕中六朝一夢空流水  
偶然作客來臨安峨峨冰雪吳山攢與我相逢各言  
晚吐心一盡平生驩吳山人獨奈何鳳皇不棲烏鵲  
柯驂騶跛蹴奴隸呵相逢不樂空蹉跎

留別吳子荆九客館

雕窓畫柱菱花古春霧暖香青滴礎白日深深十二  
樓不買吳姬貯歌舞東壁虹霓射紫微縹緗鄴架傾  
秦府禹鼎文繳百怪愁膏珠道瑩千靈忍上研象先  
沉楚烟琉璃鏡色秋蟾吐虎頭彩筆匣中留鱗爪珍  
書案頭譜吳生閉門禮九客痴夢騰騰過天午綠皮  
老桐蒼桂枝斜月踈櫺響秋雨閣外青天無片雲孤  
舟明月相思浦

憶昔行留別朱顧二子

憶昔少年不解事鉛槧空將六經刺白首翻然棄小  
儒已失平生丈夫志一生愛作司馬遊三湘春雨九  
疑秋碣石宮前青海濶玉門關外黃河流眼底微茫  
隘吳越桐栢金庭亦騷屑卷幔牀頭挂石梁脫屣門  
前探禹穴今年不赴楚王醴郢人空賦梁園雪章臺  
柳色向何人閒殺春江大隄月朱生顧郎兩知己兄

弟相親垂二紀。說劍寒生座上風。開琴暗瀉絃中水。  
古來結交重廉藺。肝膽今當向誰盡。莫道狂夫老更  
狂。仍餘白眼愁難近。世人皮相堪自憐。昨日相知今  
不然。明月翻將作魚目。頓收豎子疑大賢。大鵬自負  
垂天翼。九萬搏風六月息。么麼羸螺那得知。賜翻崑  
崙四瀆塞。明日揚帆別君去。五湖晴白揚州樹。淮陽  
太守差可人。側身擁篲迎賓處。十月黃河冰已堅。岱  
嶽突兀青天懸。吾將一放中原目。盪胸裂背開雲烟。  
掀髯大笑問吾黨。始知覆下空潭天。君將用我何昨  
還。日觀高峰吾自攀。漢家不草封禪制。相如今在布  
衣間。白雲茫茫流水泱泱。來日苦短去日苦長。今有  
旨酒樂且未央。我醉君莫挽。君醉我莫屠。詩君為我  
加餐飯。早覓春鴻一寄書。

遠遊篇贈梁六伯龍

未知君面知君名。知君已是人中英。少年讀書未得  
意。仗劍躍馬遊燕京。燕京易水千年在。英雄意氣移  
山海。尚有悲詞擊筑人。君今此去應先采。况聞君心  
壯。頗如馬子長。從吳上齊魯。拜揖闕里堂。泰山之巔  
觀日出。可以東面窺扶桑。天風吹身雲霧上。坐俯九  
垓天。似掌茫茫元氣盪。心曾人世勞勞空。悒悒南望

豐叢林詩選 卷六  
大梁墟。黃河裊如帶。衛水東流日夜聲。信陵公子今何在。願君一出夷門道。再訪侯嬴與朱亥。馬首西趨函谷關。皚皚白雪照秦山。當年據險吞六國。豈知二世捐人寰。君王將相起豐沛。多在錐埋屠販間。相逢莫作皮相士。四海結交從此始。汎汎浮湘縱所如。蒼梧綿竹乾坤裏。丈夫墮地爲白駒。一日何妨走千里。羲和曾馭日。愚公欲移山。人生百歲天地間。毋使白日凋朱顏。嗟余坐一室。四壁何所見。犬馬空慙四十年。白首無由投筆硯。壯君遊慕君素懷。慨爲君作長句。萬方文獻會成均。勸君莫道儒冠悞。

贈紫霞山人詩

紫霞山人雙眼碧。短髮垂肩照人白。餐霞吸露三千年。面有桃花紺珠色。自言本是寰中人。一朝棄家如棄塵。青山石屋閉瑤草。丹竈雲房接大椿。桃笙引月出海底。黃鶴凌空度遼水。手提龍角挂珊瑚。口誦蕊珠開玉齒。夜涼河漢縱復橫。步虛縹緲傳天聲。駕雲飛去蓬萊裏。赤帝紫皇携手行。嗟余塵心不得斷。海水空憐眼前滿。何日從君禮白雲。騎二茆龍吹鳳管。

贈俞士行

俞生九歲能騎馬。十二彎弓射鵬下。讀書懶作儒生



名十八提刀身衣赭手斬倭奴刃貫曾劍光蕩爍青  
芙蓉高眉濶額雙長目挺挺七尺人中龍結交願結  
天下士排難將身脫公子酒徒俠客紛滿堂屠販椎  
埋竟誰是風塵落魄今幾春散却黃金不計貧烟花  
屢月醉未醒翻然折節師通人悛悛授經坐講席口  
諷孫吳手投石雄心直是薄風雷大勇期爲萬人敵  
相逢今日且爲歡取印封侯事不難丈夫心中一斗  
血須作長城萬里丹

賦得廣陵濤贈李紹植

廣陵之濤天下無曲江夫乃陽侯都年年八月望三  
日排山擣海扶桑枯白日雷聲走百里青天雪色吞  
三吳混沌崩轟天地坼磔軋盤涌鯨鯨未虛吸无氣  
何所自顛倒地軸天吳呼赤岸茫茫摧萬里急走青  
蔑冰夷珠鳥不得飛獸不走老龍畏懾狂蛟誅伍公  
胥毋怒未解白馬駕濤提赤符上擊下律壯士死萬  
弩齊發愁陽烏廣陵之濤信若此我欲賦之才短耳  
枚叔已死陳琳亡李生文章差可擬李生手提一卷  
經仲尼筆削游夏譙左氏公穀何爲者膏肓攻擊徒  
縱橫嗟哉李生不可及同時說詩有陸弼春風一夜  
吹廣陵二生豈困蓬蒿室

豐華詩選 卷六  
贈嶺南張邦聘秀才

漢家射策羅英才章句小儒翻見推雕虫快奪龍虎  
氣槩楠遂嗤梁棟材壯夫何由刺霄漢國士久矣埋  
塵埃吁嗟我生頭半白感慨宇宙多悲哀今年作客  
昭陽郡笑口始向吳公開吳公自是天下士四方豪  
儁能招徠嶺南張生千里至笑談突兀生風雷七尺  
長軀伸兩臂豈肯滅沒隨蒿萊一朝破却萬金產報  
仇雪耻何雄哉腰間寶刀血不洗海水倒流山岳摧  
斬將殺人如刈菅燒山煮水用然煤龍且自取國步  
促李陵誰遣家聲噴咄嗟孺子不足數低眉濁世空  
徘徊壯夫在眼國士起使我雄心向汝回青天萬里  
白日濶對汝且傾三百杯匣中青寶古巨閱旄下且  
養真龍媒陰風淒淒吹兩耳落日不見黃金臺漲海  
連空瘴雲黑君自請纓何處來

贈金將軍進父 名科烏傷人

君不見烏傷金將軍年未四十天下聞耻以雕虫老  
牖下願將寶劍樹功勳英風凜然身七尺紫眉星眸  
髯似戟韜鈴秘畧翻五車大黃路子挽三石一朝杖  
策入轅門大帥威公威令尊英雄意氣魚水合長驅  
萬里摧崑崙七閩鯨鯢時跳擲白骨成山海波赤將

軍叱詫起風雷覆軍禽將稱無敵島血腥腥濺鐵衣  
朱旗常並火雲飛伏波營中露布出樓船隊裏凱歌  
歸聲名一日飛天上公卿侯王喜相向遠封都護鎮  
邊疆東南長城數名將丈夫得志信有時揮霍乾坤  
功獨竒何啻漢家班定遠將軍今日是男兒漲海鱷  
魚雖自徙餘孽猶能作風雨飲飛斬取在湏臾湏憑  
一劍非干羽西羗北虜屢窺邊聖人未得高枕眠君  
本冠軍忠義士何時一戰勒燕然

太霞山人詩贈周郡博參賢

渾沌死鴻濛分老鰲斷足八極尊南霍北恒中岱嶽  
東撐華蓋西崑崙擘天劃地止不得女媧補石今空  
存哀牢之山萬餘里又隔湏池幾重水太霞古洞真  
絕竒盤古先人未曾死人間巧相俱備全無情有情  
殊可憐神功鬼德勅帝命雕鏤亦是天使然邃古幽  
深誰可到千秋積雪封丹竈五色苔花鮮照人玉膏  
瓊乳寒堪療周郎骨相稱異人山中讀書經幾春自  
言白日見光怪對酒脯劈生麒麟一朝出山走朝市  
抱璞懷珍獻天子勺漏舟砂乞未終漢吏秦官稱博  
士博士今來東海東蓬萊只尺三神宮明珠采得鮫  
人室鐵網取盡珊瑚紅余本狂夫甘在野五月披裘

豐登樓詩選 卷六  
負薪者不特相逢途路間被之華袞情殊寫上古我  
不知中古吾聞耳阿衡本是畊釣人後來誦法皆孔  
子君亦何爲困下僚漆園執戟聊復爾笑殺紛紛世  
上徒只以空言博青紫

訪顧願父因登大石醉中作短詞贈之

秋山曉色青如靛有客扣門尋顧願昨日城中買藥  
回風塵不染青山面門前沽酒繫我航竹裏呼童治  
厨傳策杖便作陽山遊陽山之坳大石頭振衣一放  
千里目對酒長銷萬古愁有地空憐公聖墳何山却  
塋夫差骨夫差本是英雄人勾踐于今亦何物與君  
飲酒且大醉願將米汁澆金佛富貴浮雲何足言纍  
纍塚墓作平田君家舊本文章裔直繼逋翁與彥先  
君不見古人今人去若流誰把黃金鑄得不至今香  
名滿人口唯有酒人詩客留

雙珠篇贈王受吾連舉二子

君不見王家掌上雙明珠忽如青天飛白榆照乘豈  
但各十二光連日月懸九衢金支翠旗相朗映光怪  
低昂乍有無十洲奪取鯨鯢目九館跪將痴龍鬚吐  
從瀛海紺翼鳥列作層城絳樹株自識秋波映圓折  
誰云積翠重珊瑚宮懸黑漆靈難隱水媚丹淵岸不

豐華詩選 卷六 九  
枯珮解湘臯臺下女步搖沉水屑中姝陽燧木難真  
兩美黃支赤蚌並稱都蓋飾九華光照月鳳啣四角  
錦垂襦夫餘似棗元非偽罔象探玄定不誣魚報漢  
恩春沼戲鶴懷噲德夜門趨頷下齊來明月似蚌中  
雙割夜光俱蟾摩陰燧津爲水客賣鮫鮪滴滿盃並  
坐映人稱衛子同游擲米笑麻姑大秦國寶誰家有  
漢樹庭花此日鋪定不暗投當按劍豈應彈雀詆爲  
愚人人手握靈蛇在自解裙襦作大儒

戲贈楊伯翼

誰家小兒楊德祖青天之鵲丹林虎氣猛翮健凌秋  
風膽雄力王不授撫騷壇忽樹五丈旗自喜少年能  
跋扈嗟我老大筆力衰尚然枝癢鼓餘怒酒酣登壇  
賦大言共說將軍老還武將軍號令選褊裨汝作先  
鋒領旗鼓鵠兮虎兮誰敢侮世上凡兒何足數君不  
見楊德祖

與君房對酒詩

憐君三走長安道空見落花滿芳草千門萬戶自流  
鶯青衫却爲紅塵老春風吹人歸故園江南六月荷  
花鮮相對花前一尊酒莫使愁腸挂吾口燕金楚璧  
徒紛紛願君沉醉且勿論東隣白苧新可聞西施浣

豐堊村詩選 卷六  
紗石乃在苧羅側一朝選入吳王宮姑蘇妖艷無顏  
色荷花正比西施面出水紅妝誰不羨綠羅金釧采  
蓮人詞罷一聲君不見

賦得紅藥翻飲箕仲

今年山中春事早三月未半百花老玫瑰紅稀紅藥  
翻辛夷落盡薔薇香薔薇香紅藥翻雙花一幹紅珊  
珊綺翼死央結錦帶歲雜紫鳳聞朱闌含驕倚恨愁  
無力侍女欲扶扶不得未信長門陳后啼空令團扇  
班姬泣我欲臨風一賞之當階置酒安足辭飄雨零  
風霎然至明朝已是離披時白頭老人愁殺汝汝應  
笑我愁如許且向花前惜歲年彭殤未用悲男女

花前酒謠勸飲者余鄉名櫟社北有宋厲侍郎

墓南有明聞天官墓

朝登侍郎墓蔓然一丘青草路牛羊作踐石碣亡有  
姓無名人莫顧暮登尚書墳石馬兩行翁仲分子孫  
滿眼正華盛年年寒食紙錢焚侍郎尚書閱世多生  
前事業知如何千秋萬歲亦旦暮古人墳墓今人過  
古人今人若流水墳墳墓墓何時已今日我輩嗟古  
人它年人亦嗟吾輩人生有酒但飲之身強無事且  
莫辭昨日穠花今日老今夕月圓明夕虧尚書墓侍

卽墳其人其骨皆已朽死後之名亦何有不如今日  
花前酒

以葉生太叔詩呈張大司馬

何物寧馨葉生者新詩照乘珠滿把幽怪殊開汲塚  
雲古質鷲提未央瓦箭簇銅花綠血殷昆刀玉錯寒  
流瀉千年古鑛蝕啼痕夜半荒坑射殘竿白鼉作鼓  
裂天門南山吼死洪鍾啞鬼仙已謝李王孫詭譎難  
誇玉川也卽今論才莫可同居然屈宋鞭箠下鱖生  
得士竊自竒不敢私之老鄉社大國觀風季也聰東  
海泱泱誰大雅不能清廟薦珪璋獨獻飛黃向司馬

賦得狼山絕頂遇大風雨詞送顧益卿按察北

上

黑雲壓天天半黃大風撼山山欲狂飛沙走石卒然  
起江水倒挂天河傍猛虎毛拳縮如蝟老蛟首觸冰  
濤碎砂石打人當面來急雨橫暴乾坤沸突礮淮陰  
奪趙幟忽駭長平白起至絕似迅雷不掩耳大叫狂  
呼此竒事須臾坐定江水平青山兩岸芙蓉生何物  
痴龍幻人眼戲與天地相喧爭將軍開筵宴上客選  
地高樓在天側翠微濕處飛羽觴白日雲中響龍笛  
酒酣興豪客起舞徙席樓船伐鼉鼓五色旌旗奪綵

豐登詩選 卷六 三首五  
霞萬頃澄波明練組筵中大夫顧虎頭手曾十萬提  
豸貅漲海功高不自叙書生何用取封侯明朝復上  
燕山道秋風馬前吹綠草平生蠓蚋視蛟龍大風不  
驚翻絕倒

夢中作

匹夫自笑憂空大昨夜無端夢天破煉石徒勞五色  
成袖手低頭屋中坐客携斗酒過我門相與一醉論  
乾坤顛顛潜能徙滄海風雨夜半摧崑崙匹夫有耳  
願不聞匹夫有眼願自昏願將此語聞至尊白日莫  
令狐兔紛有酒有酒不敢吞悲謔擊碎白玉盆君不  
見撓捨星燭帝閭

江上月夜懷黃孔昭因成短謔

與君相思十載強與君相見俱異鄉海南天北未爲  
遠握手各吐平生腸平生有腸各五色吐向何人人  
莫測閉戶空山弄白雲對客青天但捫虱狂生頭白  
浪得名有舌那敢徒縱橫碣石宮前萬里道我脚不  
及君獨行我問君君荅我田先生塋何所漸離筑吊  
荆卿魂易水波寒白日墮年少我能飲聞君亦浮白  
即今君病我願醒對面空令酒人惜昨夜霜高月一  
天海氣不生銷綠烟長江繞脚衣帶小吳楚閩越俱



眼前此時思君不可得狂歌自把珊瑚擊珊瑚碎落  
江水平忽見中天片雲黑美人美人兮何不携我而  
西之使我日夜長相思手種白榆當何時

留別林通州登卿

淮南春盡青天熱風起揚花飛作雪越客離鄉歲已  
多與君痛作江頭別君本含香天上郎一麾出守乃  
江鄉漢吏唯尊二千石况當汲鄭與龔黃海城七里  
十萬戶住近三吳愛謠舞家家醜酒樂昇平海神廟  
裏來搗鼓鼓聲日夜狼山巔白浪無花龍晏眠嗟予  
旅食忽三載關尹空留著五千此情脉脉憑誰語幾  
度江花濕江雨潮聲東去復西迴不覺春帆滯芳杜  
人間離別何足論黯然獨銷知己魂廣陵渡頭一歸  
客落日靡蕪何處村

醉卧偶作

鼓刀屠狗起豐沛將相侯王多此輩販繒吹簫不解  
卑射獵種瓜忘却貴丈夫提劍出國門兩眼已自空  
乾坤乘時遇主取大物山河入手茆土尊風雲變化  
如反掌昨日賤貧安足論嗟嗟古人乃如此刺刺秋  
風吹兩耳即今四海正清平縱有經綸向誰使不如  
醉卧青山中玉棺下來便堪死

賦得靈峯洞行答袁黃巖文毅見寄

海雲如油雨未歇客愁不破毗欲裂忽驚使者飛尺  
書仙吏緘從武林發開手一讀靈峯篇頓使心魂濯  
紫淵謝公嶺頭入谷口洞前日月開何年其中百怪  
眼莫盡偃芝駢筍參青天我思一游未可得夢想徒  
勞片雲隔遙知色相出神竒負鑿湏憑鬼丁力窈窕  
花源何處深縱橫峭壁無絲靚洞朗高寒詫月宮削  
成太華相爭雄員嶠層城莫湏有羅浮衡霍將無同  
五色雲霞繪天地九重閭闔朝群帝豈是金銀作殿  
臺寧非瓊玖栽花樹蓬萊三神山崑崙十二樓閨風  
接玄圃翠海環丹丘借問有此不意者猶不佞請君  
廐下雙龍馬朝抹吳都夕越野對飯胡麻宿洞中劉  
郎爲君阮爲我寄聲劉阮舊時人流水桃花路更新  
莫使重來迷處所好將雲月作通津

爲王元美廷尉題梅竹雙清卷

弇山之堂秋氣涼主客密坐開縑緗手披一軸指相  
示剡楮玉白生古香梅花一枝雪欲墮竹葉橫侵三  
五箇帳前陟見月先流耳畔似聞風欲過剖分風月  
號雙清不知作者誰姓名王冕吳鎮兩敵手竹枝瀟  
洒梅縱橫冕筆常繁今更鮮粉痕畧校梨花淺高枕

青山不出門，鳳無聲。夢初轉，鎮譜流傳千萬竿。籜  
龍夜卷波濤寒，長梢忽斷鳳凰尾。琅玕半截春雲殘，  
摩娑老眼看未歇。梅更宜風竹，宜雪坐使心魂一夜  
飛。羅浮客向瀟湘別。

庚辰五月十六日集青浦署中同田叔開之百

穀

五月紅雲火光烈，江雨才收海風熱。我搖一舸自東  
來，滿湖正值荷花發。香氣吹人白苧涼，衙齋坐客皆  
琳琅。哦詩作賦了不輟，調笑絕倒唯王郎。手提如意  
醉起舞，白髮山人健如虎。晚來雲月半昏黃，瞞天忽  
作五雜俎。屠卿潘令花滿庭，鳴絃落筆皆丹青。秋官  
孫子有家法，出語亦復持典刑。座中馮生最痴絕，世  
上紛華等飄雪。眼前萬頃太湖雲，便可千秋弄烟月。

五豪詞

何來王郎舌作刀，雕畫人物分秋毫。馮生朗朗秋旻  
高，大海白日安波濤。銅馬玉署不得改，屠卿宰封心  
日勞。隻手簸天平，怒颺陽侯遠遁龍母逃。田叔不肯  
留，西曹偶來東遊操。一舸逃禪往往遵，白袍白頭老  
人吾自叨。騷壇此日稱五豪，青蓮豈復謾鳴臯。吳鹽  
雪花點葡萄，請君無言進清醪。明日秋風俱二毛。

吳生行贈叔嘉

吳生好奇走江海腰間櫛具發光彩如掾雄筆驚鬼神  
 滿橐新詩怒真宰自言去歲荆楚游飲酒吸乾鸚  
 武洲脚踏匡廬九江兩目覽八桂蒼梧秋楚狂吳舍  
 人粵客張京兆自免家居卧武昌謫官拂袖歸蠻徼  
 本向吳生作酒徒題詩何乃多商調我亦故人相問  
 訊結交自昔嗟廉蔭齷齪細謹空爾為誰能死縮通  
 侯印君胡不獵頭上纓君胡不翻案上觥舉棖拔戟  
 拉其首罵殺當筵老秃傖吁嗟乎江漢之波綠如玉  
 糞土之塵那可辱不及吳生兩屨泥三向華陽洞中

宿

明霞篇

殘紅未斷雨氣歇烟烟空中飛列缺車馬旌旗乍有  
 無翠幌金支半明滅日輪已隱萬層雲陽光獨射千  
 重甲千重甲作五明霞萬層雲結萬枝花九苞靈鳳  
 雙雙舉七寶仙幢隊隊斜始知天上非凡比自信雲  
 中全是綺寫來鸞鶴本生成畫出芙蓉真不死魂驚  
 漢帝東巡幸神悸秦皇西出師不然那得軍容盛若  
 箇威儀如此奇諸天豈是朝群帝龍麾虎燾傾天地  
 頓令人世識仙鄉忽吃乾坤落何處紫塞遙憐接赤

豐登詩選 卷六  
城銅梁玉壘半天橫閬風十二瓊樓起瑤島三千繡  
蓋迎繡蓋瓊樓何足擬葳蕤正是雲霄裏珠簾葉剪  
玉瓊瓏翠碣花搖金旖旎旖旎瓊瓏總是奇千門萬  
戶轉逶迤芝童盡戀華軒御嬌女頻思錦帶披錦帶  
華軒誰第一明眸瀲灩明霞質相思相愛儘相隨天  
上人間會相失樓臺蜃氣即吹成底是明霞變幻輕  
風從蘋末微微起瞬昔青天一片平

大鄣汪生行寄贈伯耳

有序

伯耳投筆取封侯之業非僕所樂聞僕願其  
建騷壇赤幟鼓後來之雋故有此寄

大鄣汪生奇雋士開口新詩操正始近來作者如堵  
墻紛紜么麼何足齒滑稽性傲狂且豪大言喇笑多  
戲嘲曹劉乃許執牛耳屈宋始合稱風騷任俠倜儻  
復好酒飲能一石少五斗磊落縱橫一片心世間齷  
齷不挂口大鵬九萬北冥飛青天不闕丹鳳輝手提  
文章換日月何事低眉愁布衣歷覽乾坤俯寥廓名  
山大川借雄作抵掌夔龍不足多捧腹巢由亦何惡  
思君訊君知所以信是天都一男子黃山靈藥可延  
年東海長竿足垂餌出身何必執金吾豈是無官不  
丈夫莫輕七寸銀不律金印如斗何爲乎嗚呼金印

如斗何爲乎衛青去病終人奴相如著就大人賦一  
日天子親招呼縱令天子不招呼何失高陽舊酒徒  
長鎗大劍君且止馬邑龍堆開馬市李陵臺畔秋草  
長蘇武澤中春水起

題周秉忠寫春山欲雨圖爲傅七明府作

東風吹海雨勢緊千山萬山雲欲盡北澗蒸蒸白氣  
騰南溪冉冉蒼烟引花迷城闕隱樓臺柳暗郊原生  
紫埃飛鳥投林急如箭遊魚出水浮萍開茅屋村村  
鳩逐婦垂楊樹樹鶯相妬麥浪青翻風半斜菜畦黃  
失全迷霧何處行舟欲下帆歸人趨走疾於颿却笑

持竿護雞客猶窺書卷着青衫長松翠虬鬱沒頂深  
竹高篁暗無影漁人收網入蘆汀樵客腰鎌投北嶺  
欲來未來天半濕滄江鷗鷺紛紛集雷聲隱隱過南  
山風色蕭蕭吹轉急此時琴罷逍遙坐越水吳山眼  
前過高樓低壓洞庭寒畫檻遙吞東海大盤礴真當  
老画師解衣落筆寫春姿曾中雲夢且八九吳淞半  
剪波淋漓周生豈是尋常者三絕三癡相上下請君  
再作沃洲圖鏡湖之水當天瀉

十月望日沈虞部王別駕邀同徐明府沈舟太

湖看落照至夜午還浮玉洲看月詩

王生沈郎真絕妙邀客太湖看落照并召令君同我  
行青雀如龍鼉鼓鬧是時陰霾凍不分天爲使君裂  
層雲須臾迸出火輪影黃金炯爍玻璃紋萬疊吳山  
青挂北何似羨陂純浸黑平波不動天鏡開洞庭如  
眉画雙碧西南遠望神欲迷混茫天水無端倪馮夷  
之宮倘其是神鬼恍忽驅虹霓魚龍出沒不可測江  
妃神女遙難即翠幌金支乍有無鳳旗鸞霧疑相逼  
衆客豪狂興莫羈鯨吞鰲飲紛淋漓眊眊乾坤在掌  
股嘯呼風雨生鬚眉使君更是探竒客手取明珠領  
下得驪龍酣睡不敢醒船頭飲酒盡一石小艇如飛  
發棹歌欸乃欲斷聲流波碎鮮割膾堆白雪銀盤疊  
几高嵯峨東林入暮烟霧消青天吐月頭上高錦帆  
直放銀河去極浦參差吹洞簫使君此時樂更甚口  
若懸河心是錦秀句譙人和者稀十月陽春落衣袵  
搗鼓再過浮玉洲水光浸月天倒流金壺竹下傳琥  
珀玉童花底彈箏篴四更客散月斜處微有江風動  
江樹白頭詞賦老相如醉別臨邛令君去

送沈尚寶純父北上長謔行

沈生肝膽真鐵石眉宇清揚髯似戟爲郎不忍國是  
非高隼乘墉急彈射一時危論稱六臣丁丑長星掃

辰極生也不從杖下死萬里投荒流電白漢賊今逢  
聖人怒一日青天浣烟霧六臣鵲起居要津七年重  
識朝天路熏衣尚璽侍朝堂即是當年執戟即雲中  
近識天顏喜日下時聞御鼻香紛紛劍履摩鴛篋袞  
袞夔龍作鳳皇此日送君情不極金昌舊是吳王國  
祠廟唯存伍子胥名姓獨傳范少伯莫言霸者無諍  
臣天王此日收長策楚猴依然化腐鼠長蛇糜爛巴  
江渚遂令宇宙轉陶唐頓使江湖進伊呂請君鼓柁  
急西征至尊極目勞當宁

孫禹錫溪上雙藤歌

溪上古藤如許大不但一株且兩箇蒼皮萬尺病蛟  
纏白骨千尋老龍蛻正值新春未作花斜盤亂結蔓  
如爪牽黃裊綠蚓不解走隙穿虛蛇入窠圈環紐玦  
無不有微索纏綿紛左右低從九地飲黃泉高入五  
雲吸天酒根強五石甕盤泥枝聯千手佛攀梯霧翳  
碧油幢蓋密風開翠幌洞門低仙人宛矣乘風御公  
子遙張青錦駐花繁葉簇鱗鬣猱風雨初來欲飛去  
竒柯忽引上青天綵繩牢縮堪秋千夕陽靜照百戲  
舞紫絲步障流春烟丹霜夜染楓林下赤虬巧向秋  
空挂我欲據此彈箜篌人不敢窺山鬼怕最愛水邊



豐華詩選 卷六  
連理樹夜深曾有仙姬遇桃花不見武陵津昔日相逢竟何處

孫生行贈禹錫

孫生有叔師王孟一邑稱詩推獨盛泱泱何如大國風彬彬正始直堪詠生也家風迥出群凌空掃電驅千軍少小詞壇即南面綠水白苧江左聞乃今折節追大雅淫哇唾棄沾沾者南邦贗鼎真足羞北里僞珠終莫假不特文章絕等倫豪飲亦復娛青春破產願結任俠士伏櫪且換傾城人昨日逢予溪水上枕席糟丘不相放鸛鷄典盡口不言寶劍牀頭光一丈自云丈夫恣意且行樂貧賤胡然嗟瓠落君不見揚執戟非無官劇秦而美新不免自投閣又不見石散騎豈無財綠珠墜金谷不免東市斲我雖貧賤何足哀對客且與傾樽壘感君意氣賦長句高歌落日悲風來

高生子游行

高生余家所自出面如玉盤皎白日雙眉刷翠心乳開年少丹青凌健筆昨持一幅過我堂白描游絲追子昂再進公麟與道子右丞亦許相頡頏古人不必兼衆藝吮墨含丹要精誼十日画一山五日画一樹

興到頃刻翻波濤醉揮滿眼須生氣嘉陵山水無粉  
本一日寫成心所記邊鸞孔雀生繡綵張藻松枝鬱  
春翠君不見當時李將軍畫壁夜卧聞水聲又不見  
玉潑墨島嶼烟沙觸手成花枝欲動蜂蝶至地獄變  
相都人驚所以大匠手運斤而成風解衣盤礴坐始  
稱真画師天生此腕汝既得好聽舅言無我疑過庭  
再向阿翁問丹青之理誰最知

蔡府主爾通祖公遣小史以手書俸金為賜兼  
以民瘼下詢臣不敢有所陳對謝以長詩一  
首共三百八字

老人日高卧未起門前秋溪明綠水剥啄柴扉忽有  
人乃是投書府公史府公尊重二千石五馬如龍飛  
霹靂腰橫黃金坐黃堂怒則秋霜喜春色長跼讀書  
書八行八行字字挾風霜尾署朱提分厚祿買酒足  
以膏枯腸久矣諸侯不下士白屋何由睹青紫翩翩  
濁世蔡中郎乃獨殷勤饋雙鯉前年剖符新到州俸  
錢歲書先遠投仲舉下榻延孺子亦復躡履迎周璆  
臣也徒然隱樵釣口唱康衢太平調公等治郡真龔  
黃欲進一言慚少效雖然不敢虛芻蕘即今所急唯  
兩條哆口高談豈吾事願以古語陳風謠南陽太守

豐華林詩選 卷六  
好興利堤閼開溝數十處灌漑歲增三萬頃所居民  
富徵卿去長安諸偷難遍捺張敞禁之如振落酋長  
數人皆富豪赭汙衣裾盡收縛公清如水平如衡手  
提赤管判死生侏儒淫褻道以禮細民始識尊神明  
東海化成朞月耳直指應須報天子璽書增秩賜黃  
金借寇一年無奪此

長詩行贈汪伯玉司馬

漢家文章兩司馬長卿富艷子長雅千餘年來接者  
誰中間寥寥無作者大明十廟當世宗右文之化成  
嘉隆東海王君少司寇新安司馬汪長公兩公筆力

若扛鼎東海濶大新安工即如兩公旗鼓立當場挑  
戰誰敢出非無陸梁二三子終是偏裨少軍率今之  
司馬匹左氏大言嚴謹小言肆東海雍容兩馬間稍  
讓汪公擅竒字汪公有文復有武大閱巡邊更開府  
至今沙漠無王庭銅柱高標振閩楚卧歸黃山已十  
年風氣大豁東南天逸駕能令俗轍改竒文頓使先  
秦傳後來俊士稱夫子前輩先生識大賢沈郎自是  
一男子頗別淄澠辨朱紫爲君談笑作狂歌泱泱大  
風溟渤起

醉歌行贈汪仲子仲淹

新都司馬善飲酒。飲中八仙不挂口。仲子頗有伯氏  
 風。大則一石少五斗。五斗雖云足解醒。游於酒人臧  
 姓名。即非燕市荆卿者。絕是江東阮步兵。巢飲水飲  
 無不可。高陽之徒其奈我。白日在天月在花。對客且  
 持金叵羅。使酒何曾似潁川。濁賢清聖皆自然。玉山  
 難頽笑開口。白眼直挂青天邊。長鯨吸海虹吸澗。捲  
 波拍船騁雄辯。次公元是醒而狂。斷不肯從妻子諫。  
 持螯有手君不聞。獨醒大夫非所論。悲歌慷慨快志  
 意。御史執法空紛紛。驩然道故醉六七。墮珥遺簪態  
 非一。錦箏聲裏鷓鴣飛。繡帳風前鸚武疾。約我它日  
 長安街。屏列如花十二釵。痛飲何辭一醉殺。荷鋪可  
 許同君埋。

豐登對樓詩選卷第六

豐對樓詩選目錄卷第七

七言古詩

何將軍賣劍行

君房觀察督學關中題此寄之

辛卯三之日乃山妻史温卿六十生日酒間作

為壽

嘉靖丁巳六月十七夜七里灘口待月

登大隱屏訪汪麗陽劉古松二鍊師有序

浴鵞池上酒家同王馮二生飲

遙看黃山行

萬石灘

皇聖朝詩選 卷七  
橫林夜泊行

題劉炤画鷹寄贈戚都督元敬兼呈譚司馬

題郭次父石田画松有序

王舍人嚴烈女為徐文長

吳中客春雪嘆

與仲足乞銅章薔薇村買酒行

秋水亭賦有序

為曹子念題快然閣詩行

善相人吳門李生秋水

鄔氏山齋食燒蟬歌

解佩刀贈朱季則季則酬以玉環

送五姪肩吾赴禮部試

賦得西湖曲送俞自還信豐

送顧四舍人汝和還朝兼柬顧大舍人汝由

謝別張二參軍文父潘二水部仲履

贈丁三肖父贈画者沈伯麀

贈奕者李釜時養贈敬修陳太學

天馬行贈朱叔行贈陸無從

贈蔣子襄函谷篇贈袁太學

慈竹杖歌贈家兄

舒士足席上贈孫衛尉千之

陳生先從福山渡江訪予通州於其歸飲之酒而戲贈以歌

贈呂泰興心文五十日即自免縣事還鄉詩以

送之

徐氏館聽徐娘解悶歌

寄贈邵淮安晦之以山東觀察副使治河之濟

寧

燕王謳為傅御史吊其少姬浦三姑

紅雲篇

雙劍篇贈錢長卿兄弟

有序

秋宮曲為青浦屠使君題唐寅畫卷

豐對樓詩選卷第七  
三十一  
下

豐對樓詩選卷第七  
何將軍賣劍行

豐對樓詩選卷第七

甬句東沈明臣嘉則父著  
從子沈九疇箕仲氏選

七言古詩

何將軍賣劍行

何將軍是吾鄉人俠節忼慨等絕倫  
文韜武畧書暗誦十八從軍思  
出身南粵提戈二十載鐵衣不卸蟻  
生鎧生擒胡平斬大將白骨堆山血  
為海功成不得一字褒親當友難幾  
見奴脫身闕下走湖海刺船躡體將  
誰投揚州一廬寄妻子草賦十年徒  
爾耳縱然

豐對樓詩選卷第七  
康瑞貞



愛客無酒錢獨留寶劍為知己將軍寶劍千金買夜  
嘯冷風吹月擺術踈燕市罵荆軻白日借交尋郭解  
昨來江上秋風高頭環鈴鈴響大刀解衣買酒仍醉  
客出觀寶劍真豪曹秋高客久歸不得提劍欲買空  
自惜江城十里千萬戶賣之三日無人識咄嗟何將  
軍長鎗大劍豈負君一朝棄去若敝屣日握毛錐攻  
典墳寶劍對君嘯未已欲語不語如嗔汝我代劍言  
君請聽慎勿輕嫌李少卿五千步卒陷絕域家聲雖  
隕志可矜願向蕪城且歸去五湖烟水淮南樹二十  
四橋明月中助君倚醉歌秋風玉門關外三千里立  
馬祈連雪山裏為君一夜掃挽捨始知我是吳干將  
請君勿賣同還鄉

君房觀察督學關中題此寄之

三秦豪傑今古同是在使者推擇工即如康王張與  
呂近則槐野前崆峒文章政治兩卓偉况復人品皆  
巨公使君軒蓋關中去辟賢書從手中注終南山高  
萬寶俱黃河水大蛟龍聚百二山河古雍州秦宮漢  
苑多遺丘漠漠寒烟茂陵晚離離草色咸陽秋玄珠  
亦落玄扈水空青水碧葳深幽使君雙眸炯春電不  
使窮谷悲遺搜女媧青天曾未改羲黃積雪聞猶在

豐登詩選 卷七 二百五十一  
只落使君衣帶邊西風吹來到東海

辛卯三之日乃山妻史温卿六十生日酒間作

此爲壽

辛卯初三月正旦老妻此日逢佳誕回數流光六十  
春一卮乃治伊蒲饌老妻佞佛誠殺牲非酒無以陳  
生平從頭爲汝話前事未語哽咽先沾纓追汝入門  
爲婦日君年十四我廿七堂上雙親貧病兼傲弟盤  
游兩無室踈狂自喜祿命窮浮沉只在諸生中困頓  
科場少推擇先人背棄仍筑筑北堂我乏三釜養藉  
汝殷勤幸無恙剛逢六十亦棄捐骨肉參商業飄散

未幾兩人干法律官府連年捕亡逸無食無兒一婦  
人支持辛苦誰爲恤痛殺兩棺在淺土病子無能親  
塋父干戈滿地豺虎紛築墳臨穴勞吾婦窮冬荒郊  
走不停泣血灑天天欲傾是時不死實天幸何意復  
有春風生倭夷東南日轉盛西奔北突家難定歸來  
鄉里多破殘供給官兵室如罄朝廷方用胡少保掃  
蕩乾坤數年了召臣記室掌文章頗恨樂羊謗書早  
脫身糊口走四方一字賣堪貧者常千金不售長門  
賦稍儲陸賈橐中裝書生薄命難傾否年年仍在江  
湖裏青春花月兩蹉跎客夢歸家空自喜悠悠卒歲

終未能望夫勞汝搖心旌紅冰雙淚積兩耳空房獨  
夜眠孤檠白髮歸來結茅屋石田近在南山麓與君  
同作鹿門畊數畝聊堪具饘粥常言有子萬事足詫  
汝爲人絕生育南國夫人詠小星江沔媵女歌樛木  
乃今兒女紛滿前一男虎躍雙嬋娟婆婆娑娑起舞喜爲  
壽烏巾莫笑歌華顛嗣子自言錐且魯上壽無能獻  
尊俎減產徒煩老父嗔從今力田事辛苦况有公孫  
亦掌珠讀書頗解之與乎田文倘得高門戶王愷何  
必矜珊瑚

嘉靖丁巳六月十七夜七里灘口待月

夜宿七里灘頭船起來待月船頭坐月隱山雲黑不  
開江搖赤壁石欲墮須臾月來江水白萬頃琉璃堆  
碧色垂竿欲釣珊瑚株客星合照初來客初來客願  
未果重來看月何時可秋潭再鼓東歸柁

登大隱屏訪汪麗陽劉古松二鍊師

有序

大隱屏在武夷之第五曲與接筍峰並上有  
汪劉二師結屋于巔修真鍊藥不與人接嘉  
靖丁巳七月十五日余與包庸之建陽丞捫  
絕壁而上訪之信宿而返作此貽之汪貴溪  
人劉新城人

豐壘樓詩選 卷七 四  
挿天削壁青嶺嶺空有鳥道雲中盤下臨深黑不測  
之飛湍上逼丹霄紫霧之仙壇黃鵠蒼猿不可度使  
人嘆息愁來難嗟我興不淺包子輕郎官平生好奇  
討幽壑凌空訪道尋雲巒足躡一線架石之危棧手  
捫如絲絆空之藤紈屏氣閉目不敢視流汗脅息驚  
心刺吁嗟乎蜀道之難豈如此自有天地當竒觀崖  
窮路轉入窈窕豁然棟宇開雲端中有至人汪與劉  
布袍芒屨黃楊冠雙瞳照人秋水冷虬髯鶴骨精神  
完牀頭丹經註滿帙階下芝草平闌干險語落筆破  
鬼膽使我一見傾心肝願君授我以長生之訣賜我  
以九返之丹黃金鈎蒼玉竿欲從滄海釣珊瑚豈畏  
白日波濤寒崑崙使者何年至蓬萊小吏緘青鸞與  
君信宿且別去莫使白霧空漫漫

浴鵞池上酒家同王馮二生飲

會稽山水稱竒絕今我來登果超越戢山亭子北城  
隈四望茫然見竒崛心遊未盡日西斜脚力崎嶇問  
酒家酒家瀟洒連春水水竹青青勝若邪若邪溪水  
清且漪問知王子浴鵞池浴鵞池今日酒家雙版扉  
歲月悠悠幾更換波心燕子雙飛飛舊時王謝深庭  
院領得春風花片片空潭花落水瀾瀾橋邊不賣王

豐登梅詩選 卷七 五  
婆扇王先生莫嗟怨馮先生休顧盼世事浮雲朝暮  
變不如手執玻璃杯相逢一醉投簪弁

遙看黃山行

新安城啣萬山黑黃山沉沉在天北三十六峰埋紫  
煙不見照人青黛色天末微風忽動衣須臾捲地雲  
俱飛眼前突兀見光怪譬如千官執笏朝紫薇仰窺  
睨視久始得俯觀塵世如寰扉祇疑黃鶴不可度充  
恐青鸞無處依浮丘伯廣成子軒轅黃帝今何似我  
欲因之問白雲白雲不語青山死

萬石灘

君不見萬石灘白浪卷花黑鐵攢鬪髀摧枯齒牙豁  
嚙流噴雪雷崩湍長鯨噬人猛虎叫出入刀劍心如  
劍鷲魂駭魄三伏慄繚繞岷岬千曲盤惡谿石瀨險  
不過使我倚棹空長嘆行路之難乃如此問余來遊  
亦何以男兒墮地合有爲云湏四方志張矢水工捷  
捩把船頭長梢五丈如龍游盤渦轉軸一葉下霎時  
已過城南樓

橫林夜泊行

扁舟夜向橫林泊月黑星沉雨將作岸上人家燈影  
懸沙頭漁艇炊煙薄蓑鄧餘舡落大帆荆吳大編收

長索長年識事誠早休豺虎噬人狼伺搏畏途不得  
高枕眠兩睫達曙不交目老夫書劍羞索然青氊十  
年穿且落胡爲中夜亦凌競自發長謠扣哀角嗚呼  
延陵不可作三讓故墟亦不惡柰何令人鬱不樂

題劉炤畫鷹寄贈戚都督元敬兼呈譚司馬

二鷹兀立何所向萬里風雲起堂上嗚呼勢欲動陰  
山狐兔并逃無隱藏凌霄厲雪秋旻空邊草欲黃雙  
翎壯金眸兩電爍胡沙鐵爪橫空恣飛颺画師一自  
林呂亡近者劉炤亦能匠越中寫遺經十年羞我凡  
姿氣殊喪九苞稱鳳羽中王此鷹真擬人中將即今

寰宇豈無人師中却少丈人行師中文人誰最賢譚  
戚二公兩推讓聖明天子張武功大起英雄搜莽蕩  
詔書親召戚將軍朔漠防秋開虎帳將軍赴命疾如  
飈晝夜飛騰辭海瘴譚公司馬戚嫖姚坐見虜銷華  
氣王二公將相英雄人以鷹相比公無嗔成祖殺過  
北斗北大創元氣斯有神古云隕霜不殺草無乃姑  
息非至仁

題郭次父石田画松有序

郭次父王大父仙舟公七十時石田沈先生  
齒已八十一高矣手自寫喬松圖爲壽上系

豐登村言選 卷一  
四十字詩乃弘治丁卯歲云當是時隨輒失  
去乃今隆慶改元歲亦丁卯蓋六十年于茲  
矣次父得是畫于揚州裝池宛然舊家物也  
事顧不奇邪懸之草堂相對悲喜蓋沈先生  
常德仙舟公云命臣記事遂有此篇

石田沈生豪雋士高誼少年郭公子兩人結交無嫌  
猜歷盡歲寒俱皓齒郭公自號仙舟君七十香名滿  
人耳石田老翁年更强手寫岨峽把相示上有新詩  
金石聲筆力墨氣殊縱橫兩人自比後凋節直幹並  
起雙龍精高堂忽驚風雨走一時賓客皆回首翠色  
猶疑撲酒缸寒聲即欲生襟袖偷兒何物解爭奇一  
落江湖甲子移揚州大賈侈至寶持售阿孫驚欲倒  
傾囊不問幾何錢但買得歸便云好六十年來還故  
物歲星合度仍丁卯世間何事無離合樂昌之鏡唐  
宮葉塞翁歸馬客何疑劍水飛龍君莫懾

王舍人

王舍人萬夫敵手挽強弓滿三石白羽插房雙鞬直  
金頂皂帽高一尺生犀束腰錦袖窄仰天欲射雙飛  
翮應聲迸落連雲翼春城草肥官路碧寶鞍壓馬桃  
花色邯鄲酒豪五陵客意氣爲君行不得王舍人萬

夫敵天子憂邊急用兵寶刀正是安邊策請君提刀  
向虜庭莫待秋風吹鬢白

嚴烈女爲徐文長

倭賊突寇雙林街白日已死陰風霾千家萬家避賊  
走兒女爺娘各分手嚴家有女正青春姊妹同行却  
避人阿爺遇賊斷臂死驚殺如花雙女子賊牽雙女  
向前行哭爺腸斷聲復聲此時欲死不得死恐死含  
羞行數里高橋陡絕俯清淵一女投橋向九泉此心  
真比無瑕玉賊夥投刀反驚伏橋是當年寶女嚴一  
泓秋水浸冰簾山陰徐渭曾婚請因疑女父前盟冷  
死後相聞感慨多題詩更續清風嶺

吳中客

吳花吳草愁春烟茫茫白日迷青天天涯有客不歸  
去水流腸斷春江前春江水流不復返明日客歸猶  
未晚

春雪嘆

邊隅氣候苦不節二月春強尚飛雪大海吹冰亂作  
花孤城凍斷關門鐵一自新年人日陰風雨彌旬幾  
時歌麥苗已死花不開殺氣憑凌太驕褻吳越干戈  
不肯休野老吞聲泣青血



與仲足乞銅章

君昔寵我雙銅章秦篆李斯漢張蒼提之十年不去  
手不羨當時會稽守余也無官頭已白權判風烟掌  
山澤白衣卿相君莫嗔世人號作文章伯却嫌肘後  
空累累再乞數顆腰間垂題詩近寄武陵長作字遙  
緘王母祠請君刻鏤破心血雲書鳥篆神工絕恨無  
卞璧逞良師山齋夜泣昆吾鐵

薔薇村買酒行

豪傑相逢破肝膽大言欺人吾豈敢終身貧賤誠不  
辭富貴在身志方展但視不義如浮雲命固有之非  
所遣乃今颺泊湖海前詞賦雖工那得錢長門阿嬌  
不解恨無金聘妾相如憐迷花嗜酒高陽伴中規度  
矩慙大賢但負骯髒心不苟事干謁彈鋏羞向人當  
路耻罄折若以握齷求天子亦不屑酒酣發憤懣吾  
言豈空設李白作客揚州時三十萬金盡散之余才  
雖非白也敵黃金在手揮亦得自知吾道尊但許異  
人論侯王之門仁義存權勢不來空斷魂腰間寶玦  
解君去買酒且醉薔薇村

秋水亭賦

有序

顧汝修與余生同年且同月余生月十二日

雙星棹  
卷一  
十九時爲酉汝修生日二十時乃爲子壬子  
生朝訪汝修于秋水亭爲余置酒酒酣朱邦  
憲韓元良乃起擊鉢命韻俾余作此汝修昆  
弟及唐世具俱在座

秋水亭何所有上有琅玕萬立青下有蓮花大如斗  
芙蓉曉石綴眠鷗燕子晴簾拂疎柳水底青天流白  
雲座上金尊注春酒四面紅闌壓月宮一鑑青銅冷  
雲母漪漣藻荇帶風牽雷雨魚龍向人吼朝暎五采  
射金盤初月一鈎墮清溜天空鶴睡露凝簾夜靜客  
歸星在留青山骨立若爭癯老樹杈枒如露肘當階

紅藥翻三春滿徑黃花鬧重九玄冬龍女貢霞桃六  
月鮫人薦冰藕瀟湘雲夢似爲隣海若天吳自相偶  
高雲渺渺九疑飛怪石巉巖六丁剖主人乃是方壺  
仙坐客元爲倭佗友閒來月下共傳觴醉起花前齊  
擊缶圖披縑素走雲烟蠹落芸香蝕蚪蚪商彝周鼎  
列西東龍劍犧尊紛左右羅襪輕盈度水仙銀櫛低  
垂出溪婦不同金谷閉繁華似與嫦娥較妍醜緩譌  
金縷啓朱唇笑弄玉笙明素手行呼洞前一羽衣釣  
引波心雙巨口觥籌亂轉無後先爛熳新題記誰某  
酒兵花令握陰符暮鼓朝鍾忘子丑人生得意須盡

豐登詩選 卷之七 三百九十四  
歡莫把青春暗中負君不見古來賢秉燭遊逢時  
不樂誰將欲我持杯爲君壽漱濁醪剪春韭燈下舞  
君肯不頽然醉卧無何有秋水亭白眉叟渴來直將  
滄海吞留得狂名垂不朽明朝萬事付蒼茫覆足須  
令錦衾厚君不見秋水亭白眉叟

爲曹子念題快然閣詩行

天地何莽蕩人生徒勞勞衆虱處視中何當解天弢  
達人忻所遇順風飄鴻毛快然乃自足看花嗽春醪  
娛目成美色何須如與衰悅耳爲好音何必彈雲璈  
滄海亦徒深太山亦空高鯤鵬樂北溟鸞鷁甘蓬蒿  
所性在適已窮達緣偶遭堯舜誠細事周孔皆齷齪  
曹生本才彥三十尚貧賤豪氣薄青天英姿照春電  
猶然守諸生不受鄙儒薦小閣題快然聊以展筆研  
勝日多朋從沽酒作高燕酒酣發長謠任彼滄桑變  
君不見阮步兵挾琴携酒白眼青又不見阮阿咸騎  
馬逐婢姑不嫌樂莫樂兮相知愁莫愁兮別離期所  
惟兮旣至捐玉珮兮何疑今人齷齪古人死我輩行  
樂湏及時白日旣沒明月已來與君且上逍遙臺青  
天洗盡綵烟滅一嘯萬古悲風迴

善相人吳門李生秋水

蒼蒼古樹城頭起伍相祠前漫秋水掉臂閒行吳市中落魄逢君似唐舉我本東南大布衣聖人無相天所與謂道從今恣齧肥四十三年吾足矣四十二年吾足矣只恐齧肥老無齒又謂張蒼我亦同無齒猶堪飲人乳君不見李生李生何太奇宰相物色風塵裏蔡澤誰當說范睢掇取功名片言耳

鄔氏山齋食燒蠓歌

淮霜蠓肥何崛強江沙黃甲深遞藏秋高郭索輸稻芒海客徒誇海味長鄔家厨頭生異香纖手出自閨中良想當臨鼎炊桂漿細剝春葱雜椒薑玉盤高疊黃甲張觸鼻垂涎不待嘗攘臂希鞞恣大嚼擘開紅玉凝膏腸湏臾盤空恨指衆澆以黃流三百觥世間快事那如此何不封我淮南王

解佩刀贈朱季則季則酬以玉環

解刀贈君君解環環如明月照腰間佩君此意不敢斷願斬妖邪靜紛亂吁嗟乎刀頭血痕浸成紫世間誰是奇男子專諸已逝要離死

送五姪肩吾赴禮部試

吾家白眉汝最良汝年十二能文章乃今計偕上京國譬之駮駟馳康莊萬里青天上滅電追風氣何壯

豐華林言選 卷七 三百六十四  
誰憐老驥解長途  
蹴躡風塵卧空巷  
空巷我甘心  
康莊汝當力  
汝去臨岐我放歌  
我歌雖狂汝當憶  
汝當憶何所以  
人生七尺天地軀  
富貴功名草頭水  
明廷大對湏致身  
莫以空言博青紫  
我今作客吳山中  
相逢正值酒錢空  
爲湏解劍取一醉  
仰天目送雙飛鴻  
賦得西湖曲送俞自還信豐

錢唐東南大都會  
山明水麗西湖最  
鳳翥龍騫天目來  
綺繡盤迴巧難繪  
紺殿瑤宮紫翠中  
朝霞暮靄漁樵外  
昔人訶舞至今傳  
銷盡黃金湖上船  
春風煖逐桃花扇  
秋水晴驕紅粉蓮  
蓮房綠結蓮心苦  
誰解吳娃怨  
歌舞當筵一曲勸  
君惟君不惟兮  
妾當怒妾當怒  
羞殺我只恐西湖  
解笑人白首攢眉  
空瑣瑣我今十餘  
輩盡是賢豪人  
餞君西湖上頗如  
兄弟親我有西湖  
曲一一爲君陳  
君莫忘西湖月  
今夜尊前照離別  
君莫忘西湖花  
明歲開時天一涯  
君才磊落如鄒如  
枚君貌魁梧于思  
于思黃金白璧尚  
埋塵埃爲君一洗  
身上泥西湖之水  
清且漪爲君一寫  
曾中愁西湖之水  
澄不流君歸梅花  
國我寄孤山中  
驛路遙通大庾嶺  
與君共置梅花筒

送顧四舍人汝和還朝兼柬顧大舍人汝由

黃龍江頭潮欲來  
舍人朝天青雀開  
錦帆十丈挂白日  
船頭搗鼓聲如雷  
故人相送離吳越  
風吹柳花白如雪  
舉酒勸君君莫辭  
水綠雲青天上別  
昔年持節還故鄉  
春風馬蹄塵欲香  
即今侍從光明裏  
兄弟皆爲天上郎  
一雙白璧世所無  
不負當年兩丈夫  
聖人垂衣四十載  
更喜風烟罷東海  
入直遲迴西苑中  
應聞天語傳花外  
嗟我讀書不得意  
低頭肯事雕虫枝  
十年著賦成兩都  
爲余一報賢兄弟

謝別張二參軍文父潘二水部仲履

狂士讀書三十年  
干祿不售徒自憐  
漫遊湖海歲已

晚匣中短劍空  
秋蓮欸段行吟向  
都市半在花村半  
山寺踪跡孟浪令人疑  
白眼罵人不解事  
張生潘郎與我厚  
日給俸錢供買酒  
壚頭少婦喚彈箏  
忘却都門爲客久  
丈夫不解取富貴  
頭白依人亦何爲  
有策欲千萬乘尊  
耻似儀秦作游說  
明日別君去吳越  
荒山馬蹄爲誰折  
拂衣歸卧海東雲  
思君一片青天月

贈丁三肖父

湖海十年知姓字  
今日相逢何造次  
君當病目才一開  
適我臨門遠投刺  
建安才子誰是奇  
君比丁儀天下知  
文章未售黃金價  
樂府先傳白雪詞  
修眉廣額

文中虎三十猶淹在塵土鳳皇未語鶴未飛空使兒  
曹笑稚魯今年陽九文運昏黃揚厄閏何必論聞君  
欲遊武夷去三十六峯當獨捫仙蛻雲中藏幾匣參  
差玉筍青天插去年我上隱屏眠曾與仙人論丹訣  
况聞鴈蕩山乃吾越之海余生四十年徒馳神夢在  
君行試割片雲歸去後毋教音信違秋深製得荷衣  
在已待西來丁令威

贈畫者沈伯麀

昨逢尤生爲余画寫出烟波重無價縱得黃金不賣  
人草堂長挂嵇山下今歲相逢得沈郎丹粉場中

擅場吳門時稱文太史更授前人石田氏太史今亡  
君在門筆法傳來宛相似君能乘興寫滄洲氣壓瀟  
湘控石頭清沙遠岸杳莫測眼底似聞春水流把君  
臂飲君酒聽君謔歌皓首世上風流幾人有請君自  
寶匣中劍慎勿輕彈向人走我本青山客愛画頗成  
癖鑄詞有黃金贈君無白壁出門一笑兩無疑洞庭  
波動連天黑

贈奕者李釜時養

憐君意氣風雲姿豪俠不數幽并兒自言世本關中  
傑帶礪猶存箭頭血當朝代有執金吾七尺鬚眉美

豐登梅詩選 卷一 一百七十七  
丈夫才高氣猛薄將種甘以沉淪固前寵天下呼君  
乃奕秋始知上將先代謀武侯胸中有成筭庖丁眼  
底無全牛楸枰落子高樓夕手擺山河開戰色四面  
合圍一面攻一夫當關萬夫敵陰符黃石俱等閒機  
翻滄海鋒摧山秦兵取捷渡遼水漢將拔營趨趙關  
嗟我平生昧棋理觀君對壘殊可喜龍虎風雲變化  
中斜飛直走俱不空碁罷從容復坐定撫掌論心細  
堪聽笑殺塵中握捉人海月山雲兩相映得失分明  
反掌間世途何事有波瀾明日天涯別我去萬里茫  
茫向何處何處春波無鯉魚逢着南來好寄書

贈敬修陳太學

漢家張騫使西域同行無一還鄉國十年不得要領  
歸侯以博望酬功力陸生一言下椎結橐載千金聲  
偉烈報使歸來拜大夫奉約稱臣龍準悅嗟嗟陳君  
書生耳飛渡扶桑萬餘里三寸舌卷鯨鯢歸落魄青  
袍故如此嗚呼丈夫七尺軀當以天地爲車輿大乘  
滿載畢吾事敢以微力辭馳驅君不聞介子推龍蛇  
之歌亦胡爲綿山綿綿怨未已至今寒食無煙炊又  
不聞舟之僑酒酣陳詞一何驕脫君于難職固爾求  
之不得將焉逃請君勿嗔且勿喜努力將身報知己



我本高陽舊酒徒莫謂狂生之言無足齒

天馬行贈朱叔行

廐中千群萬群馬何如櫪下追風者  
桃花叱撥胭脂斑爭覩龍文五霞赭  
矯矯八尺飛電光駿尾雄姿氣獨揚  
骨相權竒振綠髮豈是房精降  
驪驪欲行未動風先起獵獵烟塵走  
千里四蹄蹴踏沙河水一聲嘶斷  
瑤池水天閑當馭玉鞭驕戰壘臨  
戎金勒調調良信得神龍性習伏何  
煩圍御驍乃知天馬種自別大宛月  
氏空汗血縱有黃金白壁如堵墻難  
買神駒此超越君不見朱叔子無乃是  
世上凡兒何足齒爲君

訶罷天馬篇穆王八駿風前靡

贈陸無從

廣陵陸弼翹然起才過機雲賈生比  
自言家世晉之人結髮從師授經史  
年餘三十尚諸生未得乘時取青紫  
古心不渝甘澁落草玄日滿楊雄閣  
東海沈郎調頗同一見披肝兩相樂  
鳳也求皇遊四海閱盡賢豪空自慨  
雖云刎頸願相親久要不忘竟誰在  
結交豈不深知音貴知心對面隔九  
嶷談笑生劍鐔長歌行路難涕下不  
能禁知心不知音高山流水空牙琴  
知音不知心夷吾多取爲貪金古人  
所以重知己爲

豐登林言選 卷七  
知已死言非誇當時設非鍾與鮑後代誰憐管與牙  
枯桐不遇中郎來焦尾爨下終成灰楚國君臣不識  
玉卞和所以三刑足丈夫才德既兩優不合終身守  
一丘與君俱抱布衣願定不將珠暗裏投

贈蔣子夏

蕪城十日凍雨歇瓊花觀前欲飛雪坐君高館寒氣  
無暖酒喧呼兩耳熱論心剪燭喜連宵人情反覆驚  
波濤與君不獨重意氣相知信足稱投膠三國英雄  
推蔣琬君姓偶同才力滿文字先秦兩漢間子長孟  
堅脉不斷高談性命真鄙儒空言無補徒自迂六經

在世懸日月法而行之師有餘哀哉此輩誠齷齪欲  
以象恭盜天福君今棄置不復爲耳目精明氣磅礴  
請君結社同爲懽輸心寫意白日寒羲皇在前古道  
復山河朗映天地寬白駒走隙不肯待相逢何必生  
悲慨達則堯舜窮黔婁莫怨終身老淮海卽今士氣  
日下頽君與我輩同挽回太原陸生醉起舞高臺落  
日悲風來

函谷篇贈袁太學

逢君關中人一問關中事四塞嶠函隴蜀竒天下山  
河稱百二太白刺天日月低陰崖古雪何年漬秦宮

漢殿今有無渭水終山自流峙孰作咸陽一布衣三  
秦豪傑竟誰是棄繻終童二十春騎牛老子五千字  
即今豈亦有斯人使我懷賢耿西視古人已矣君莫  
陳請言當代賢豪人平生願見者數子不列通侯登  
膺仕武功康學士空同李大夫鴻筆開大雅古道芟  
榛蕪劃使群盲睹白日頓挈九地登天都太史羨陂  
公華州王祭酒文采風流亦後先信是山川鍾氣厚  
九原可起吾執鞭惜也吾生乃其後君本關中稱世  
家江都今又名閭右不用文章等數公古人意氣真  
能有高館唯延四海人與我相親期皓首我困風塵  
四十年青衫憔悴空華顛寶匣星文暗龍劍錦囊流  
水停朱絃策名每落孫山外下第却笑劉蕡前甘以  
浮雲視富貴不隨俗眼爭媿妍感君交情絕時態下  
榻屢月相留連爲君一奏函谷篇白眼望斷秦中天  
問君故鄉何日返我欲咸陽市上同君眠

慈竹杖詩贈家兄

曾王大父松泉翁月旦七十推龐公稷丘先生乃孫  
子於我再從稱老兄兄也今年亦七十有子孝廉能  
亢宗神清骨竦筋力健眼明細數天邊鴻即今已是  
杖國者齒德無嫌老鄉社九節慈篁佛面奇持以贈

兄兄莫捨君豈不聞漢盧敖杖遊五岳登仙曹又豈  
不聞葛坡杖化龍飛去青天上願兄杖此同二仙坐  
閱滄海變桑田世間一萬八千年

舒士足席上贈孫衛尉千之

秋風蕭蕭吹白屋大樹將霜半凋綠主人愛客開玉  
缸座上賢豪盡推轂推轂將軍武且文曾于海上立  
功勲功成不肯事權貴數竒猶是李將軍虬髯白面  
強弓挽五十封侯未應晚淮陰不得遇鄼侯饑來誰  
進王孫飯即今西北草茫茫邊臣不待縛賢王勸君  
強飯且飲酒莫惜春來兩鬢霜世間萬事俱寂莫唯

有詞人傳制作况有曾中百卷書何用麒麟画高閣  
君不見孫武子昔斬吳王兩愛姬將軍罷休淚如水

陳生先從福山渡江訪予通州於其歸飲之酒

而戲贈以歌

婁東陳生白晳兒少小綽有龍陽姿郡官推擇作小  
吏歲將國計輸京師忽遭長安網羅手幸免爰書脫  
虎口赤身歸來家已貧不廢笑謔能飲酒一日手持  
廷尉書重以王郎雙鯉魚挂帆訪我秋江上翻憶當  
年相見初聲音不變朱顏改坐定風流宛然在汝陳  
往事吾淚零相對淒然生感慨勸君莫向婁孥嗔有

雙聲詩選 卷一  
舌在口何足貧君不見陳平亡走渡河津自起刺船  
空裸身美如冠玉食糠粃嫂也豈識英雄人人生貴  
賤若轉轂淮陰亦遭少年辱南面稱孤號楚王一朝  
女主夷三族我今白髮垂兩肩尚思黃鵠騎青天昨  
日鄉書一紙傳憂疑滿腹蘄百煎破涕爲歡吾爲汝  
汝且爲我歌少年少年不再得行樂計莫左韓椽身  
懷異國鄉潘郎輿擲盈街果餘桃食罷棄前魚醉殺  
花前無不可

贈呂恭興心文五十日即自免縣事還鄉詩以  
送之

君不見陶彭澤到官解組八十日門前五柳高拂天  
黃花種滿柴桑宅又不見呂恭興五旬自罷猶足稱  
語溪西頭十畝竹秀色直使南山增故人作客旁近  
縣題書勸君爲君餞此冠既免不復冠濁世賤儒今  
不賤神武門前挂者誰咸陽市上人空羨君去歸歸  
來乎身隨麋鹿走天目心逐白雲飛太湖縱使紅塵  
高泰華那能一點及潛夫歸來乎君速行我家石田  
猶力耕况君藍田玉可成何不杜門日強飯坐收白  
日羲皇名

徐氏館聽徐娘解悶歌 解悶小字也

徐卿宅裏見徐娘未啓朱唇先斷腸春風欲墮盈盈  
淚忽隔桃花幾度香桃花易落人何似短髮俄驚被  
雙耳不有清歌傍酒尊白日令人愁欲死徐娘不改  
舊風流曉黛春雲閉兩眸月出梅邊羅帳小新鶯一  
派轉謳喉歌喉婉轉新聲變三峽流泉珠一串游絲  
不斷青天長湘水無雲人不見此時錦瑟盡停聲銀  
燭流光白雪明四座寂然無一語碧霄唯聽鳳皇鳴  
鳳皇鳴處梁塵起灰者復然悲者喜華清凝碧失霓  
裳結綺臨春無淶水頓令嬌鳥不啼花何處離人不  
念家緩聲更作江南弄煖氣噓成五色霞字字有情  
傳別恨拍拍從心寫春怨怨入東風草欲千恨填流  
水花將萬徐娘徐娘柰若何玉釵寶髻空差我垂楊  
一繫門前馬淚濕青衫誰最多

寄贈邵淮安晦之以山東觀察副使治河之濟

寧

使君賢名滿淮甸幾度相聞不相見昨分俸錢供酒  
資手把八行如對面奪君治淮專治河繡衣豸冠將  
若何金隄瓠子悲漢武問殫爲河迫東土濟泗徐淮  
海不流鼉鼉畫舞蛟龍遊萬年鎖斷渦神鐵青天不  
動黃河裂憶昔宣房築未成負薪寘決皆公卿吾山

豐堊村言選 卷十  
既平薪不屬衛人空盡淇園竹即今天子真聖人河  
伯那敢爲不仁璧馬不沉堯舜理看君功成等神禹  
太史復著河渠書鹵田畝粟十石餘此時訪君清濟  
上食我河魴兩相向白日行天四瀆開挂帆一破長  
風浪

燕王謳爲傅御史吊其少姬浦三姑

暖紅燕玉春芽短中有貞心鐵難斷淺黃微綠柳絲  
嬌早嫁東風雪吹滿世事從來不可齊庭花忽散柳  
綿飛烏鷺御史庭中樹妾聽門前烏夜啼東西萬里  
相回顧錦梭只逐鴛鴦度眼判孤雛雙燕離弱翎不  
怨東風戍東風兩度桃花子院落春沉海霞紫水寒  
珠冷月無光一夕芙蓉抱香死粉落紅飄香不銷花  
竿揭揭海風搖金雞忽布陽和路一段春魂不用招

紅雲篇

美人紅顏誰不憐珊瑚肉映桃花妍難將粉黛汚西  
子爲君一奏紅雲篇高唐觀東日初杲赤城山頭霞  
欲鮮湘烟曉膩臙脂水楚樹晴連濯錦川君不見一  
朶唯將玉皇捧漢宮誰奪昭陽寵絳節幢幢踏綵虹  
瓊樓紺闕朱堂聳又不見朝行暮行何處歸只逐襄  
王夢裏飛劃然一聲檀板起迸落紅雲似流水

雙劍篇贈錢長卿兄弟

有序

不佞夏月過長卿所避暑其尊人輒爲河朔之飲至懽也酒酣欲起舞長卿兄弟乃出二劍視之不佞心善之而愧非風胡子輒鑒定其某劍某劍云而爲千百年奇物可睹矣于是作雙劍篇贈之

秦溪蒼茫東海上謁飲涼堂早供帳酒半膝席光陸離一雙白虹把相向白虹欲吼龍欲飛四座爛爍驍流輝使我停杯不敢語太阿巨闕還是非七星照夜月不死黃金錯鏤電光紫淒風緊冽若有聲霹靂似

從手中起曾聞七首徐夫人淬藥試之血濡縷又聞不疑櫺具劍佩作衣冠儀甚偉意爲兩物眦昵間又恐龍化延津還干將莫邪雖去久或者仍出歸人寰荆卿術疎聶翁攝項莊起舞項伯接要之神物當有爲不用尚方須節俠君家兄弟堪請纓莫以文儒空立名仲尼夾谷兩觀下留到至今誰不平

秋宮曲爲青浦屠使君題唐寅畫卷

漢宮沉沉秋尚煖長信更長未央短含風殿前風正涼太液池頭月初滿不知別院更淒清金粟齊開玉露盈穠粧曉鬪群姬艷結束如花箇箇明逐隊分行



共嬉戲羞管琵琶各携至錦囊未解白雪停碁局平  
鋪子將試內有紅綃作欠伸秋千架上更誰人訝舞  
歸來應力軟腰肢瘦盡怯餘春扇底流螢俱不見鸚  
武不傳心裏怨人人情結翠眉梢無奈庭花落如霰  
君王想在竹宮西白日如飛烏夜啼朝朝暮暮愁如  
海鳳管龍樓行幸稀摩娑此卷沉吟又南宮北宮知  
是否春風圖画搃由它真膺難窮當好手茂苑唐寅  
亦俊哉風流不減晉時才浮雲得失今何有零落丹  
青不用哀

豐對樓詩選卷第七

正